


卷之三

范德機詩集

岑安

卿詩集



范德機詩序

范先生者諱惇字德機臨江清江人也少家貧力學有文章工詩尤好為歌行年三十餘辭家北游賣卜燕市見者皆驚異之相語曰此必非賣卜者已而為董中丞所知召置館下命諸子弟皆受學焉由是名動京師遂薦為左衛教授遷翰林國史院編脩官與浦城楊載仲弘蜀郡虞集伯生齊名而余亦與之游伯生嘗評之曰楊仲弘詩如百戰健兒范德機詩如唐臨晉帖以余為三日新婦而自比漢庭老吏也聞者皆大笑余獨謂范德機詩以為唐臨晉帖終未逼真今故改評之曰范德機詩如秋空行雲晴雷卷雨縱橫變化出入無朕又如



空山道者辟穀學仙瘦骨峻嶒神氣自若又如豪鷹掠
野獨鶴叫群四顧無人一碧萬里差可彷彿耳晚尤工
篆隸吳興趙文敏公曰范德機漢隸我固當避之若其
楷法人亦罕及其居官廉直門不受私謁歷佐海北江
西閩海三憲府三棄官養母天下稱之嘗一拜應奉翰
林文字而有閩海之命不果行至順元年年五十九卒
其詩道之傳廬陵揚中得其骨郡人傳若金得其神皆
有盛名其平生交友之善終始不變者郡人熊輶也揚
中將刻其詩命其子繼文請序為書其始末如此嗚呼
若德機者可謂千載士矣揚中字伯允傳若金字與礪
熊輶字敬輿詩凡若干卷富州揭傒斯序

元故承務郎湖南嶺北道肅政廉訪司經歷范亨甫墓
誌銘

士之汎濫於虛文而忽畧於實行也久矣波流茅靡之
中有特立獨行者焉予烏乎不以東漢諸君子例之哉
清江范梈亨父一字德機家貧早孤母熊守義長而教
之天資穎敏所讀誦輒記憶年未三十予識之於其鄉
里富人之門雖癯然清寒而熟察其微有樹立志越數
年漸著聲稱其處也苦節固窮竭力奉母其出也假陰
陽之技以給旅食其耽嗜於書鑽研於文用功數十倍
於人人鮮或知之也年三十六始客京師勲舊故家延
致教其子弟藝能操趣弮中彪外流光浸浸以達於中

朝薦舉充翰林院編脩官滿部注建昌路照磨憲臺有
聞名者改擢將仕佐郎海南嶺北道廉訪司末屬不憚
波濤之險瘴癘之毒巡歷遐僻每務興學明教民之抱
冤官之受誣者一一為全活申雪政譽上徹仍其所職
遷江西湖東憲幕憲長嚴明於僚屬中獨異視選充翰
林應奉又擢福建閩海道知事言俗本汙而文繡局取
良家子為閩工無別莫甚嫉之閔之作歌詩一章具述
其意弊憲長采之以聞於朝其弊遂革居十月越會江
淞行省禮請校進士文卷行至建寧移疾竟歸託於外
族而家新喻之百丈山天曆二年授湖南嶺北道肅政
廉訪司經歷以養親辭不赴其秋自湖廣校文還逾月

有母喪明年十月以疾終年五十九娶楊氏先卒晚有
二子庶出也持身廉正不可干以私疏食水飲泊如也
為文雄健追慕先漢古詩近體尤工藹然忠臣孝子之
情如杜子美又善大小篆漢晉隸金溪士危素慕其風
數從游處未終前兩月往哭其母時疾已劇尪羸骨立
謂素曰世道之卑士氣之陋甚矣子其勉諸吾殆將死
已而果然素知其卓犖大節浮湛下僚又不獲中壽其
子長者甫七歲幼者四歲懼其湮沒無傳乃撫其行事
徵予撰銘將俾龍虎山道士買石勒諸其墓嗚呼亨父
誠特立獨行人也而素之高誼亦薄俗所稀范之詩文
有所謂焘然稿東方稿海康稿豫章稿侯官稿江夏稿

百丈稿總十二卷銘曰
介潔之行瑰璋之文而止於斯也來世倘有聞乎噫
至順二年辛未秋七月翰林學士資善大夫知制誥同
脩國史臨川吳澂撰

范德機詩卷之一

臨江

范梈

亨父

古詩五言

送張鍊師歸武當山

張君瀛洲人來作武當客始來武當時祇著謝公屐弟
子百數輩稍稍來服役誅茅王萬柱空中現金碧辛苦
三十年夜臥不側席以之律鬼神故亦如短墨元年踰
冬旱朱火燒四國野谷方焦熬六月畿甸赤朝廷亦不
愛犧牲與圭璧僵巫暨僊史歌舞無消息君時待詔來
公卿初不識一朝傳天語問以濟旱策君云臣鄙愚造
化非所測陰陽有開閉此實智者責公卿復致辭物生

今孔棘已救京兆尹取足輸粟帛比如解倒懸祀事惟
所擇君聞猶固讓心寔內憂惕飛章白玉闕瀝膽殫悃
幅臣寔才淺尠臣寔學迂塞臣有一寸心願輔后皇德
后皇本愛民民今旱為厄或者罪有由皇亦重開釋祈
謝各有方呪禁各有式上堂薦明水下堂考金石夜分
謝請命既昧爽大施設為壇東市門經紀法靈冊庭中
玄武旗飄飄墨水一作黍黑君臨一揮手怒髮上霄直指
揮東方龍卷水東海側指揮西方龍卷水畧西極北南
暨中央各以方率職某日某甲子漏下五十刻我在壇
上伺不得忤區畫豐隆與飛廉列缺與辟歷汝將汝風
馳汝遣汝雷擊汝雲馮勿滴汝雨必三尺汝不從誓言

不畏上帝救至期果響答動蕩七日澤常時人所難君
若不以力公卿奏天子是必有褒錫可以寵號名可以
蕃服賜君曰天子聖卿從誠所格臣敢貪天功況在歸
計逼迫昨得山中書至自青溪宅向來百弟子遲歸在
朝夕暎時冬序半霜下木葉積明當課斬伐結構西岩
壁山田晚報熟芝朮及採摘獼猿長如人夜夜盜柿栗
隄防苟不豫六氣盡蟲賊公家事既已私事容棄擲方
知用世士遺世等糠粃所過如虛空焉知去留迹戒持
一瓢酒欲以贈遠色歲暮不見君悵望空中翮

奉同元學士以落日滿屋梁猶疑照顏色為韻賦
贈鄧提舉之官江浙

青天青如石星辰何磊落適見北斗高忽復滯郊郭感
此流電驚行邁孰為樂况值杪秋令清商動涼幕芳宴
候朋親驅車背河朔登高望四野下田畢新穫於時不
同賞惆悵睇雲嶽古人有云然末契重交托托契自有
初相晞在結髮請持交龍鏡比似空際月昔月三五盈
今夜三五缺月盈自有時僊君採薇蕨採薇陟崇岡空
筐不易滿季女懷朝飢日下光纂纂豈無機杼思十旬
義一澣含悽就經緯意長絲緒短路逢相識親要入鮫
人室館泣下仍成珠更苦哀歌緩緩歌浮雲停急歌流
水促水流亦有宗雲散復成族踽踽行路子離居振群
肅會合寧無期載感時運速晨風懷苑林玄鳥辭華屋

明發念飛蓬秋聲浙江曲浙河名山水在昔最餘杭浩
浩負海隅區地絕川無梁執玉奉禹會帶甲宣吳疆慨
彼仁義都風俗殊興亡末代綴鯨會周衢涕絲簧聞之
虛廟閔斷雨生蛩蟹幸及九域一四民海一作樂時康游
歷湏慎重勿用多瑒殞傷矧茲握新命出布堯文章惟
當日月遠足昭雲漢光淒其金氣厲嘉實方斂藏楊柳
臥枉浦蒹葭委嚴霜物情各有歸我獨不得將仰視雲
中雁肅肅俱南翔雲雁明天中回首顧齊州沙嶼重鯨
互竟復少遲留欲知鳴雁心黍稻非終謀視彼群飛者
矢心良不猶不猶將謂何豈復不如茲明年擇聖蹈既
往無復疑譬之駢蹄駒昂藏養雲姿下乘歲百駕逸足

誠歸誰伯樂偶並世當受知者知長鳴待儔侶首路復
安之所之在東南斷水列風嶠至人遺吏隱出處惠兼
妙干莫居匣中千年逸神耀一朝持入手未言心相照
照之千里外如在只尺間明夜夢見君怡怡越河關惜
去不須更念來亦循環古時岐路人何用涕潸潸景岩
草木斷虎豹啼空山方冰先春水野飯維清灣買觴斲
魚鮮甫謝金鑿班此行竟遂媿亦慰親友顏天目掃煙
岫日夕飛禽還還山中桂樹多庶為故人攀攀花貽遠
道洵美道中輒若復無相忘報之雙白壁美人如芙蓉
隔浦無相識舊交日以違新交當日得各自有殷勤初
不在容色俯水愧游鱗仰空慚飛翼眷言執手地歲暮

霜霰迫踟躑復踟躑悽惻重悽惻

寄謝周文學

周子雅孝友聲價動江隅有言新詩敷道腴示
余以詠嘆累日不知劬雅止風亦衰賴爾亦區區與予
初識面青春滿洪都別來二十年王事勞馳驅山澤念
耆舊風塵揚鬢鬚焉知離憂中乃得此長娛公園橘柚
寒驥鳴感脩塗發音詠隆施重見能來無

贈馮鍊師歸岳陽

王子吹笙侶精神如九秋暫攜碧山屐遨歡帝王州江
湖未識面寄語旋鳴騶夏雲逼幽澗春鳥啼芳洲行色
當及春景氣適惠柔眷眷將歸客勝日懷林丘何時謝

燕闕亦得西南遊洞庭木葉下期爾岳陽樓

贈學正洙扶櫬歸真定

朔風吹急水哀雁繞天鳴送子川路遠浩蕩扶神旂少年挾高藝求仕入皇京祖父通籍家蟬聯及弟兄奈何抱長痛鞠此霜霰情伯氏江外居心殫慈母驚奉命持哀來留連鎮陽城會言襄祔事各復東西行生養死當葬若為好爵嬰勗子泣血日寡言收視營尚愛千金軀以保百代貞

次韻古體二首

偶為淳朴語即有希夷風在世能勿忤聊以古為同大巧三代人所辨偽工曲哉末學士妄擬述作功至性苟

能盡焉得推盛隆先師予狂狷蓋憤失所中於時依歸敢嘆吾道窮

聖道缺已久文不克其資自從夏殷來因革當從誰中更鳴鳥聞載嘆德之衰寥寥太師樂復得存那猗大音苟有託不必稽其辭設有盈樽酒日夕斟酌之樂杯當在手自今不復疑胡為不復疑賢者當明知

和胡掾

三違江海春再見歲將夕開軒暢微風忽近載陽節鳥鳴氣適和晨鵲亦稍集逮歡不猶今萬事已逾昔緬懷命世士具為知所役翻知不賢名可足濟身策而我拙自藏流動日月積達觀良有餘仁者造其極播弄明珠

篇時草當更碧

貽字述魯紳編脩

悲風動日夜游子絕河山一別十年流四方幾時還憶
子旅江外過余撫林間曉色竹掩靄春容杏闌珊陽坡
鳴赤鷄陰館來白鷗文義相剖析宴歌亦循環吳星迹
夢變楚月帶愁彎自來燕薊中相望漢沔間初傳教下
郡或道釣清灣起居雖未悉聲聞已難攀明聖御八極
震驚折群奸登賢彌制斷進士嚴刊刪倒澤起游泳搜
空集翻翹斯時麟見郊絕世驥在閑豈期脫布衣復得
聯朝班始疑迹異方卒見意俱閒惟此冰雪壺近當雲
霧關紀載竹帛藏潤色絲綸頒儲才藏地閔抽思刮天

慳固當讓俊逸焉得委跡頑物化豈堪玩仙栖庶可扳
寤寐在靈嶽傍徨愧塵寰碧州蒙澗吐青霞冠雲鬢長
生願不負竟往事無艱常聞羽人言頗落俗士顏早伐
九節杖倚之聽潺湲

蒙恩供奉翰林未行改佐閩幕自豐城便道取疾
絲撫過盱與郡守薩侯會約游麻源不果明日別
盱

暫遠雲霞觀却希山水音珠星聯極下璧月動江濤始
集寶氣亭復趨金晶岑馬飲樹連澗猿啼風滿林揚瀾
思汗漫睇領寫嶽岑輟棹更垂釣推書時弄琴石門生
夕陰景麻源籠晚陰是郡遇賢守佳致契幽尋尊俎迫

清好絃歌彰古心郡中宜鳳集泓下或龍吟頗愧塵務
逼還為旅病侵一行混吏軌千載負國琛即往事莫究
於茲念方深姑仙如有意遂許一登臨

上巳日文宣王廟陪祀畢歸西館作奉貽儒宮諸
同志

禮殿肅春薦齋居清曙鐘斜街星斗轉阿閣煙霧重久
去金華直暫依赤社封非才需教育希世念遭逢休風
洙泗治日舒黃農深恩曷効報彝典幸追蹤粲粲金石
列鏘鏘珂珮從飲福嬰多疾高臥對千峰

昨夜書懷將行且書且賦因成十二韻

鉅海截上國危星轉清旻去來抵二極俛仰適周晨往

鵲無遺影潛魚有縱鱗勁風山葉碎濃露草根勻卓彼
趙李輩鬱為唐宋臣忤恩非棄置知命有高屯妙句鏗
金石荒臺蔓蒸薪憑高重回首懷古獨傷神記別玉堂
夜來尋丹竈春常恐學仙侶亦猶辟世民蓬萊雖異島
即此是通津

上牛頭石望海

人謂此石險我言茲境佳日兼山氣動雷與浪聲偕平
浦煙浩渺高林雨參差游魚依碧澗飛鳥却丹崖飲濁
涎孤坐乘危費亂排稍知舒磊砢初不近俳諧玄圃知
何許蓬萊在所懷將尋白雲侶高處結茅齋

重五日至西峽渡解后閩帥王侯盛稱山川之壯

余謂可以為知矣亦復有賦渡近方山之下

繫馬西峽間朝曦射屋丹赤城中見方山江上成亂石
緣流感重險攬勢得鉅敵不有歌詠懷徒困馳驟役因
之竊歎欬美哉此嘆息尊醕清屢注槃荔朱新摘紛厖
異方俗卓犖同門客去去無久留薰風蕩南國

送樵隱侍親之濟南

春晚川陸靜日高風雨收斑衣隨授節畫鼓送行舟未
知會面期寧識離思憂崇旌殿歸雁柔櫓荅鳴鷗遠去
違四美幽尋考三周菱荷生歷下煙浪際吳頭設有來
魚使因之寄舊游

西巖夜宿懷雷州幕府同僚

月出萬籟靜岩宿紫煙淡解后逢清景飄蕭同素襟久
辭蓬萊苑復憶嵩高岑掃雪待白鶴凌霄看翠禽如何
較竒賞而此事幽尋雖負簡書畏還希金玉音徑暗泉
移澗風踈星滿林願持千里意空外寫瑤琴

奉同陳應舉月夜齋宿玉堂有賦五首

崇館肅玄闕虛扉敞彤碧詞林何蒼蒼國器皆奕奕顧
惟樸樸材謬忝文字役嘗僚負簡陋祇事浚蹶踏於焉
嚴明享況復在今夕

奉禮慚明信斂誠資宴歇風露洒九天星辰逼雙闕屏
聽非效聽規行殊改則春容啟華萼宵影動林樾思君
空中雲惠我席間月

幅員施廣圖輪魄昭晬像三后猶照臨萬代極瞻仰寶
之在禁密本以肅靈夾豈伊程苾芬遂爾通貯響洞洞
乎其忠洋洋如在上

塞直慕南董良朋憲夔臯孰為非我事相命須其曹被
褐騫寒素奉璋參俊髦王戡載簡冊臣職效柱牢忠敬
道無二笑談誼彌高

燭暗曙鐘遠詩成春漏沉古苔見隱約幽檜響蕭森白
雲留寒色青雲延夙心在闕諒當補唯賢庶可欽願逐
西蟾影長棲丹鳳林

袁州謁韓祠已宜春臺晚眺

乘月泛脩渚凌晨訪崇臺曾薨匝地起疊觀凌雲開時

須炎夏首斗柄從南迴四周翠嶂出六合清風來王明
猶日月憲令若風雷惠澤綠郊樹陳蹤蒼澗苔鼓鐘代
寂寞輪軫路徘徊茲守郡者自昔何雄哉百鳥見孤
鳳衆星麗三台吏負鈞石寄法已豪分該云胡荅臨眺
遠揖謝英才

八月十九日城東辟喧孤坐書懷

始生值高秋久客感流年曠茲琳宇閱瞰彼滄海孺霧
畜朝雨洩雲汎暑風還避人非絕俗淹病實妨賢昉膺
良辰會適使中情宣靜能驅百慮生已暮孤騫焚香禮
碧草種玉思藍田焉得青鳥使馳歸王母邊

留贈黃明府

黃甫古傲吏而多清白心屈身試下位載道發清音洗
刷邑弊陋宣暢民滯滯荒村無吠犬秀隴有鳴禽淵明
不醉酒子賤自彈琴未必盡師古何曾暫渝今裁詩俯
碧澗煮藥玩虛岑清眠消白晝高視抵黃金我本江海
人常聯桑梓陰攜持粵山酒寤寐朔城砧鴻鵠歲月晚
鯤鯨煙浪深還為異鄉別舉手一沾襟

繇海昏入武寧道中

登高勢欲墜踰險心始領戒想適其恒經過何由騁洩
雲行崦杉零露浥澗茗玄蟬振山淒皓鷺團沙整久盼
歸舟近况懷垂釣永豈不畏嚴程無因攬流景煙霞蘊
至樂歲月啓溪省百丈有幽期眷茲心耿耿

過梅尉祠下

梅尉清萬古許令騰八埏能官不必高高者迺其賢真
材儲世用遺蛻或如蟬嘗疑說者謬何獨今不然斯人
井竈處往往在林泉還丹誠可學但恐難為傳

七月初二夜洪州對月懷百丈親舍

初秋公府肅明月到南軒開懷納清輝林影類溪園偶
得塵氣靜萬籟此中存物生感氣機候蟲噪四垣心虛
無所入起坐復何言猶云不如雁飛逝抵高原

和廉將軍村居二章

居止簡物競頗受歲月侵誠願輸崑崙遐舉遺浮沉時
冬萬物斂野迴景載陰雉鳴穡在場煙火村巷溪兒女

戲我前有酒聊自斟自斟何足貴得飲勝千金聖哲去
已遠六籍傳其心受生敢不愛發憤攄長吟
念世居難終忘世亦易度今日庭樹落明見飛雨沉疴
從誰解采草時自炷萬里無一歸願得妙者悟寥寥宇
宙間舍此復奚慕

九日報熊敬輿

羸疾臥江滸承君慰高秋木落塢渚淨天朗氣暄柔便
了晨光中授我雙螭蚌呼高童敬薦之風味宜南州憶
昔客燕薊白雲從方舟於時見此物千錢三十頭打黃
試新羹爛醉天市樓一日食一百更為明旦謀三日困
暴下傳笑諸公侯此邦誠罕見初出一作愈難求矧當
浮萸日傾道俗如流厚價得兩螯持之比琳瑯物有少
為貴感事重綢繆奈何雷同者政復多優游欲折黃金
花報君向滄洲此花苦未發少待歲寒酬

贈安西王提舉別

車聲何軋軋去我亦翩翩借問車中人幾時到秦川秦
疆數千里西與雲棧連行人秣馬過猿啼上青天長安
古帝州宅土腴不偏聞君荅平昔宦游祇晏眠十齡涉
文史十五懷家禮二十學壯游五十綴朝聯奉常老掌
故今已二十年功業晚何就蕭蕭髮垂肩天子念逢掖
錫官頗靜便紫衣綰墨綬此是車中緣飄飄上都門白
馬錦連乾舉案招青山孟光老猶賢大兒坐車軒小兒

調馬鞭中兒又絕好國語荷珠圓旦夕俟君至買舍清
渭塢此皆足慰意日食官俸錢俸錢足養親親自有三
田人生慕富貴富貴翻受憐不有鐘鼎食亦無膏火煎
前日三市事日擊心凜然當時氣凌人不得呵烏鳶觀
君浩蕩去萬事當棄捐孔子不西行及河軌再旋今君
涉河流西路方綿綿終南與嵩華是中多神仙仙掌出
浮雲上有三峰蓮真人玉拄杖挂在明月弦便當往從
之吸月升太玄金鼎交龍虎使我神貌堅奈何二三月
百憂集離筵空花如錦機野色相交鮮楊花亂愁思萬
條散青煙我不酌美酒敬讓故人先槌碎琥珀盃獨洒
春風前春風澹無言徒以別慮牽別亦無所慮所慮應
當宣願及相思時中腸鬱糾纏為吹雙紫燕銜書到君
邊矯矯蕭徵君珠貝藏龍淵一別如列星隨天夜移躔
鳳有五色瑞時下岐山巔請君問起居歸來定何年

宿夏莊

陰晴知何如開戶月滿地主家種長榆竟夕薰風至半
生朝市蹤頗負山林意及茲登覽餘亦復纏世累棘籬
臨大道嘶馬駭童稚衆臥復離披躊躇獨無寐江山轉
寥落星斗亦連綴丈夫十載間豈獨鉛槧事

夏日奉酬汪使君

浮雲無時停浮雲有時停停雲在何方乃值初雨晴我
亦毒炎伏歡言酒盈瓶解帶斟酌之醉已萬慮輕飄飄

翼長風便欲東南征林壑蓋青天上與霞霧爭安得逕
至此念之觸中情使君新詩來陳義富且精私慙應涉
淺如畜不克羸忘已量須進茲乃聖所營冰然內熱解
始識道非名

贈方永叔往教重慶路

汲水得明月倒影上青天客行三十年未識蜀月圓中
宵夢巴蜀秣馬辭燕服成都雖云遠未到意已足遠意
不可期宿夕宛見之雲迷飛鳥道雨急臥龍祠干戈何
草草祇說渝州好但得渝州官甘就渝州老渝州古雄
城彭君舊建旌至今江石上猶有古時名豪傑世已矣
空城俯流水復有江東人來教渝州士方侯天機濶大
雅託遺音沉潛萬夫敵脫略五湖心翩然別我往長揖
仙人掌疾風吹大旗落日明斜舫即此少相知相知長
恨思巫山桂樹發折寄定何時

冬至日

冬陰已解剥天運旋其初晨興理書策盼望周太虛纖
雲無凝停旭景亦已舒未知太史家偵言復何如古來
聖明世不必徵其餘和氣乃致祥斯語端不疏大田黍
稻滋秋事在菑畬誓將理歸楫臨江卜吾廬

天冠山

江東有天冠山翠鬱嵯峨浮嵐衍縣郭鳥啼若笙歌古
來有真人學仙雲巖阿丹成脫之去晞髮臨咸池年深

化為石石色切星河至今剛風吹梁不偏頗羽人室其
下厭見頂婆娑朝陽夏影縮秋月夜陰多吾欲救五丁
掇之趨滄波東挂扶桑枝此心諒匪它弘彼日月光不
可將如何天寒歲又晏雲露滴煙蘿

送吳真人持詔寧親

垂楊十二門旦旦羅鳴騶千騎萬騎中孰是違世儔美
哉吳夫子脫洒住丹丘氣涵群象動思與萬物稠周天
馬出名駒逸態橫九州自從下地走但飲星河流明月
落中江倒影射斗牛飄然持玉節去犯蒼山裊紫鳳把
細華逶迤仙巖陬遂經三茅岑已登閣峰頭還家拜封
君玉冊珊瑚鈎笑問游子衣不獨五色優門懸朱雀旂

坐擁金明表開筵范芳醴魚觴進庶羞承顏開淑訓慰
爾道路脩爾歸奉天子萬歲更千秋番君大國壽賀老
清湖愁煙水三萬頃宮袍在扁舟荷花合古渡此處不
夷猶雲錦雙鴛鴦悠悠戲汀洲東風長年來揚我闌檻
幽白馬絡金羈奈此甚盛休儂家閣峰下霞竹敷稻疇
鶴集偃松雪青雲互綢繆自從干戈餘川岳秋蕭颯骨
肉倚四海風雲擾吟謳聞君復此去浩蕩懷今游罷酒
黃鸝鳴高華艷城樓良辰難能別嘉會易為酬至樂夫
子行子行無滯留

贈揭景哲茂才別

司揭本楚官子孫以官氏揭陽漢建侯氏實出於史同

源而異派流流各昧其源泛舟在中河安得窮崑崙驅
馬燕山市路逢子揭子為我述其先本自司揭始及乎
盱徙洪著與揭陽通以茲究其源瀕海而南東南東煙
濤惡將身犯蛟鰐遠拜故侯墳遺蹤尚如昨歸來見翰
林贈以雙南金集賢亦敬嘆高文留賞音二公天下士
子亦庭階美胡不攬家釐黃朱耀閭里九萬扶搖風相
看尚轉蓬高樓有橫笛送雁上長空

贈李端朝別

驅馬別舊故舟檝麗城隅欲復少款叙子云不可須哀
茹激長雲群飛滅霄衢孟冬猶溫風鄉此川路途迂賢
良策上第再命出南區沉沉大藩府勤事以馳趨幸接
江湖歡豈期流坎殊一朝遂西東何以慰踟躕高霞映
列巘寧不眷名都解組翕清譽在德由豐翰要當給餘
用初終保瑾瑜

散步還南軒

幸自塵鞅絕起游欲何之江遠夕氣澄開軒納新詩莎
鷄振陽砌蠨蛸結陰池珊珊修木靜宛宛好風遲一作馳
桃李競春園旋隨時艸萎寧不悅生植肅殺乃其宜於
斯見發育及深霜露思稔康本達節竟受薄俗嗤快哉
東方生嘲吟得吾師

市汊口水驛候邑吏不至北亭書懷

端坐息萬慮於此道心存江沱歸雁集楊柳落柴門刻

符期邑吏日晏已成昏相望不百里曾莫思崩奔以為
公家須緩急義所敦嘗抱慢令戒空復嬰一作憂煩藩
羊蹂嘉蔬頗傷王者恩雖非四鄰物祛除奚討論小橋
通北亭澗涸青煙繁未明復來日暫得辟塵喧塵喧不
足辟班馬在丘樊遠想高堂君逝將反中園

發富州

駑拙謬承乏巡遊至茲邦登危始出幽歷覽見長江不
與夷曠會焉得壯心降力小而任重民憂正紛厖斯須
舉隱慝顏俗何由扛初下豐水船爽氣夕浮窗柔櫓奏
長風中流鳴鶴雙景晏川色淨巖際懸漁叟行止欽聖
則胡能守株椿

寄劉掾

往與魏盧亘談君在直廬會時春月和者事重踟躕聞
子大夫掾廉厲久猶初羈孤限馳驅不能枉尺書建康
古名都自昔帝王居陳迹今具在斯人定何如清吟足
度日羹飯可無魚勿論爵祿事於此自有餘廟堂議賢
寶匱美將常安舒峩峩惠文冠四海將誰譽

嘉澤

嘉澤徧群物山郭餘寒收日臨公館靜聊足散優游古
松含晚秀春桂吐新柔樹聲鳥語和苔徑蚓行周念彼
農畝士生涯託巖幽雖無豈弟賢亦免瘵曠憂而我委
素業布衣以教遊謬通金閨籍一志旅荒陬還歸吏鄉

部胡寧心不休
淡承采菲意終負
伐檀羞庭闈
邇江外
何時泝扁舟
誰能違天命
且復盡人謀

度澤過關山

單車度大澤
有似游梁山
初非雁鷺徒
辱在葭葦間
季冬陰風盛
雨霰紛珊珊
念我離大府
行役何時還
朝臨昌邑浦
夕指番易灣
衝泥赴農村
老屋夜不關
然薪設供帳
風味猶百蠻
蒸烘濕衣裳
徒御相回環
極知道路難
尤念奔走艱
傳餐逮明燭
飢渴未容慳
春和理稅駕
且以慰衰顏

古干將

叢叢古干將
經世不再見
豐城匣已空
龍亦久當變
百怪日夜出
思爾一剗斷
衰佩美紛紛
不爾真百鍊
又恐百怪飛
翻著它人身
麒麟或失所
魍魎氣益神
不如且深藏
慎勿干星辰
我歌干將行
庶為君子陳

須句曲

朝望須句曲
青桑被原野
牛馬何茫茫
盡在大隄下
隄高容可隱
河水隄上流
年去復年來
青蒲送行舟
借問行舟裡
誰是回鄉客
燕趙與東吳
憧憧競晨夕
山中有老人
白髮不可量
白不緣年壽
何由爾許長

泝漳水有懷在京二三子

晨發宜姑渚
迤邐泝黃流
天清鈺鼓和
檣櫓隨川浮
南征卜利涉
陽晷適三周
野花明遠川
時鳥詠芳洲
麥苗

已含秀蘆筍亦吐柔一行被明命豈不職思憂時物已
俱變未得吾行休一作吾未眷眷二三子秉德聿宣猷
崇高諒能淑大業非人謀惡乎報終令庶以荅山丘

鵲來巢

靈鵲空中至棲我庭樹枝樹高不尋丈下有弄丸兒朝
騎庭樹俯暮仰樹巢窺寄巢欲生子值此將焉為是以
舍巢去拮据忍如遺青天覆上林何息非所宜物情非
有異念亦顧其危倘逢愛護者鵲有復來時鵲聲但報
喜說似主人知

盧鴻草堂圖

在昔有志士隱居嵩高峰行義一作架四海矯若人中

畢邱作義

堂畢邱作屋

龍天子念治具詔書訪孤蹤既來亦竟往去就何從容
架巖結茅堂虛砌蘿蕪封身雖草土間道為世所宗攀
磴采石華引手接雲松朗揖謝汗瀆長笑紫煙重不能
諧聖君豈徒愧萬鍾安得起斯人千載已相從

和荅楊茂才

始我南山居與子共朝夕服事子尊君德義藹宿昔焉
知二十載萬變如頃刻漁釣負平生浩蕩隨所適進漸
負官箴退媿尋幽迹而此山水間時勤問消息夜深款
巖扃蘿月在屋翼清言溢前聞子學自有力世好將未
忘相資庶有得

春雁

砢砢九春雁整列向天端雖念洲渚幽已違霜雪寒群
行旅陽土亦為稻梁難啜食曾未克知時詎能安銜蘆
領孤雛蕭蕭理羽翰明年還當賓勿興中路歎

范德機詩卷之一

范德機詩卷之二

臨江范梈 亨父

古詩五言

韓山曲

韓山白雲下遙見翠竹祠其祠何代人云是宋君時里
中有周氏子孝母深慈所以樂慈母不吝千金資為母
築別館旬帶好園池母曰我暇日臨眺良歡怡夾山為
壽藏死汝葬於斯及死如母言攀恨無窮期即館奉母
容灑淚松栢枝至今澗空阿幽鳥鳴聲悲故老更為語
母訓猶父師子止孫已貴孫復昌書詩紫衣要黃金入
侍白玉墀間歲萬里至展省甚光儀流水莫自急浮雲

有餘思誰能和此曲為繼荆棘辭

二杏 甲寅

北隣杏一株身作龍盤擎直上青天中虛空高結花南
隣杏更好枝幹相交加三月二月時匝地堆紅霞自我
來京城寄居諸公家其地僻且阻茂樹繞窗紗亦有桃
與李盛節爭豪華雖富無可人紛紛亂如麻晚過此二
杏突兀超塵沙嘗時好客來立旆遙咨嗟欲去復顧戀
往往至日斜我昔直詞館羸馬道路賒晨往昏黑歸無
由領其嘉今我已投散終日猶枯查朝暮出見之百匝
虛簷牙而我又將去何繇報繁葩誓將適南郡辟地江
之涯種此一萬樹漫漫被荒遐花成實給食收拾歲盈

車此事亦易集但恐君疑誇

贈別白忻州

昔年上都門送君作太守今年太守來失喜狂欲走問
知郡中治稱寬不容口彊欲對酒歌愁引杯去手古來
選郡監本為奸慝糾豈宜肆其奸私鍛鍊易妍醜達幸
逢賢執法白日雲霧剖快馬歸并汾且以慰慈母失身
落州縣茲事無不有君子善奉持凡百淑爾後排難與
解紛吾媿魯連友明年江之南得寄消息否

檢校菊吟

百華已爛熳虐雨更及晨虐一作雲疾風吹青空好日麗芳
鄰自知園居僻少與繁會親編籬種黃菊元不計秋春

昨朝新芽吐大葉已輪囷軒昂各有意未謂非其神故
廬凌雲下苦壤多荆榛孤芳久不見貫酒問遠人

雨後山莊圖

川容麗過雨百谷會新流溪路凌高轉佳木鳥鳴幽我
田橫岫下黍稷歲可收不謂有生意乃復見將秋時從
野老飲歡語載道周宇宙無終極此外更何求

道靈巖峽宿吳都人家

野飯寄峽寺重過已三秋雖若陟降難險頗歡臨眺幽
風翻白練帶樹響黃粟留舊宅有主人無復識先猷向
者之名園老木陰相繆青山入坐席白水抱門流自傾
鷄黍載感古心悠悠

谷口散暑

谷口月未上漁火出橫塘門前面稻畦畫鼃雜風篁
童州弄山墅今茲白髮長新歸稍結構日俟海江涼琴
書散衡宇藥物布滿床謝告未緣衰以得不得將維時
仲夏半織女當西堂嘗恐梧樹落莎鷄戒衣裳平生荷
耒志經歲失豐穰此行庶無負海內膺時康

登石城驛亭

南游未是謫北行不當歸今日陟崇岡飄飄風吹衣始
我在京時雙闕凝秋暉別來守窮海故國音書稀竊祿
滋媿負何時覩柴扉胡不依白日去即能如飛驛樓俯
平川其下白雲圍雨餘足稻梁可以信豐飢去去道路

遠王事母稽違

饒國吳氏晚香堂

大江秋似練楚樹落清曉巖際不逢人翩翩數歸鳥饒
君庭宇靜澗水黃花繞爛錦照天朗繁錢承露小何當
鷓鴣鳴誤識春事了焉知歲寒姿獨立西風表乾坤有
清氣欲少未易少搖落暮春期美人煙霧杳

立秋日分司書懷

清晨鐘鼓鳴海角金氣應芳樹哀蛩歌凜節亦已微如
何向亭午毒熱尚炊甑是宜起居謬不與安養稱逝川
無回波駕馬少返乘簪髮恥虛名丘園激高興飄飄百
年內過者已蹭蹬強學而有成庶以道自勝

將赴江淞大府校進士試會疾止建安驛上後山

東眺郡城作十二韻

青雲建安郡人物故鍾秀承旭開芳樽樹凌虛列遙岫
溪聲涌夜長石角吐秋瘦漁沙府圖讖仙室川浸溜征
塵汨炎毒服事彌奔走秦淡淡鴻鵠舉蒼蒼鷹隼候山
英若在淪館飯菰登豆勤渠相國誼忝竊大夫後顧惟
論賢能奚取推寡陋吾欲救五丁雷雷激宇宙疾飛移
萬壑及此洗昏夜起為梅子真南厓掃丹曰

送荅里麻廉訪使有序見文類

龍節猗皇皇六轡忽如流聖主命大吏出按東南州東
南何所有榕荔蔽山丘溪有險跋履淺有佳教遊繡衣

關戶庭法署若瀛洲提封憲令行霜日淨高秋公來天
為歡公去海生愁渺渺衆庶望為我少淹留郊亭接烏
石楊柳蔭清溝鳥哢方睨皖花林復綢繆吾聞古君子
弗替進退憂昕朝正圖舊庶用慰忠謀

肇慶李知事會別至峽上阻風因以懷李

取別非云暮王事有程拘臨流逢執手復念野踟躕季
秋北風急遥遥引方艫出峽江始放迢迢波浪敷仰天
覺形全俯地會心娛暫得珪組解樂與漁樵俱撫事悉
解后迴翔且須臾滿秩不受更竟行諒非愚

詠古

五言在王國安所雕琢工肇及蘇李輩猶復相沖融往

還離別者人情之所同正聲始微茫與世狎汙隆遂令
天地產山川與雲風鬼神百物怪屈曲歸磨礱組繪麗
群巧爭以為長雄雅道日以晦六義誰折中後無述作
者仰止泣麟翁

贈別羅元友教授之應昌

翩翩郡博士騎馬涉長道居庸關門北仲夏綿茂州應
昌信殊僻宅近今豐鎬雖當清冽鄉足以消熱惱天家
振文治造士克國寶延攬必時髦如何戀芹藻驚風吹
過雨川水白浩浩但祝慎馳驅歸來顏色好

感興

龍駕迴層霄陰衝伏照光聖人一萬歲有道過虞唐戎

與二三子羣珮爭翱翔玉京陳義金匱發冥藏春容麗
藻繪晨色法孤芳停思候物媚況思鬱難當願及西北
風馳之通建章

四日朔經楊林作詩命奉宣布郡縣值大水蠶麥
俱盡淡念民生

吉日涉大川單舟若鴻毛搖搖遇順風泛泛凌雄濤已
過赤岸渚復宿楊林臯權師何心術在險益一作無勞
受命未踰期觸目嘆所遭蠶熟麥再空萬口聲哀熬年
時有災地白屋皆滔滔不能補分寸奚用徵秋毫綸言
本溫厚下布肅官曹奉宣吾職爾庶用抹蕭騷

八月十五日公堂讌別作

悠悠我行邁去此粵山端遲明駐征車爰盡公堂歡開
筵俯城郭簫鼓集儀鸞謂欲戒醉飲重此良辰難閉門
集會府僚友並征鞍更辭無別語但祝長加餐役者四
五人相從出林巒亦復路旁泣豈獨殊肺肝況我離慈
母朝暮偵平安送行各如許焉得不辛酸

秋日海康齋居

吟事久已落茲辰遇高秋泠泠空中籟襲我書帷幽如
何寒暑疾竟與大江流江流不復轉歲月已還周游子
去京華邈在天盡頭胡雁不踰嶺眷眷非良謀排雲挹
飛觀金爵露光浮在遠心所仰胡為滯滄洲茅屋足草
花洵美難久留苟能一吾志斯道將何憂

懷丹丘奉寄元尚書

舉酒撫往日酒盡得離愁初謂歸心迫海天今已秋虎
豹守玉闕宮殿天上頭青春白日和麟鳳俱來游廣成
攝四象安期扶九州下視汙濁世漂轉空煙浮仙人要
我來招我任丹丘豈非交不信景晏此淹留明日鼓桂
檝徑泛星河流高樓有長笛黃葉下滄洲

止酒

大鈞播群物攘攘勞吾生得酒足痛飲何用身後名所
以戒飲酒豈矯世俗情昨日足歡笑今日愁思盈多見
桃李花語亂作棘荆反以飲名歡何以忘虧成靡穀漢
詔切喪邦周誥明奚必宇宙內獨有屈子平

曉出西郊

自春已及夏歲籥寢中更平旦西郊道始聞啼鳥聲川
晴樹氣嘉夕露枝條盈西峰近在眼白雲夾路生一從
違夙昔好懷鬱難并未知高世意忽復何以營屠狗與
漁釣俱足成大名卓哉箕穎客使我抱淚誠

登西山頂還方澗作

弱質有負向依依在物表謬當城闕隘放意窮昏曉晨
興理良戀啓途慮已悄白日滿澗阿林虛荅鳴鳥幽尋
晚適遇頗覺知者擾俛仰古人迹達生未為少緬彼高
翔禽凌空自騫矯

秋江釣月

秋江明似鏡，月色靜更好。之子罷琴來，蘿徑初尚早。衆峰更滅沒，橫笛隔幽島。我船爾棹歌，絲綸蕩浮藻。潛魚却寒餌，宿雁起夜縞。離離不可招，白露下煙草。高風桐廬士，俊業涓川老。同是釣魚人，那應不同道。把酒酬清輝，如何荅穹昊。

郡中即事十二韻

儋耳九州外，邈然在南荒。周回數千里，大海以為疆。古來非人居，禽獸相伏藏。自從中世來，貢賦登明堂。其或失撫馭，山藪更陸梁。聚則成蜂螳，散即驅牛羊。高結舞大鹵，上衣不備裳。殺戮乃酬勸，誅之仁者傷。吾嘗七八月，持節泛滄浪。一旬錄郡獄，詢事考纖芒。問之守郡人，莫識為治方。但見西風多，解字秋蕪長。聖哲戒忠信，勿謂不足行。及茲蠻貊始，見斯道滅。

出甘蔗州

清雨氣候變，移船孤石灘。已行千里餘，始驗初冬寒。暫解霧露毒，稍知江山寬。新人異言語，故事同憂歡。思昔夏后氏，封建天南端。伯業起句踐，世遠子孫殫。無諸佐大業，遂作漢王官。身受閩君策，白日海澄瀾。至今崇臺上，列戟絢衣冠。古來樹名節，於此事嘗難。惟有精英在，青霄明羽翰。

晚登南樓眺烏石九仙方山諸峰

自來閩中郡，僑寓公宇偏。身病縻服餌，單居日如年。憲

署歷三試愚庸寡所宣茲行臨辟道屢勉以周旋日夕
登高臺遙盼四山川山川亦云美宜與萬慮捐慈幃隔
江關稚子目娟娟連夜夢新堂嬉戲在我前祿食無寸
補遠遊何當還東風號陰澤此土候氣先草木相衰榮
已復爭碧鮮思及方春時買船向邵延長歌蕩暄景吹
笛玉臺煙行止欽聖訓義著良象篇此豈不在人虛心
以勉旃

四月八日訪閩粵王無諸古城遂至蓮花峰下僧

寺寺乃唐王審知祠

維夏氣清宴原藪樹龍葱上弦適休暇游詠紫煙中石
澗演新流山苗含惠風肥芋膚隱白崇榴葉張紅撫節
警代謝未歸憂心中承官勤政術但覺祿養豐句稽困
日月始得如游驄觀省職何補庶望禪至公遺丘隱莎
草廢剝在空濛而况塵境事斯理固有終

數日毒熱喜雨適立秋先三日也

夏末始炎毒沉憂坐匡牀起行無所之登高睇遐荒問
昔西風歸飄飄向何方往還不可期賴得天道常聖主
御大曆故可稽明堂絜絜白駱駝茲晨郊路長念我伏
遷次江海葉再黃旅懷抱焦火思濯寒水鄉忽來浮蒼
雨爽氣吹衣裳稻田已就穫晚種待新秧微軀亦易持
但願蒸黎康

新雨塔除花藥倍茂田里生意懷之欣然情至有

述簡諸作

久旱埃霧集閒居寡高情微雨夜來至滿庭花藥生長
年憂里術退坐若無營偶攜一榼酒得喚故人傾念彼
毗隸便勞生在耦耕薦飢苟不熟何以供王程幸天沛
時澤食息日已寧繕性衡門下寒飢無足驚

苦熱懷楚下

苦熱不可及念此西南風誰云灝氣遠乃在庭戶中我
家百丈下井上雙梧桐向夕集歸鳥未秋足鳴蛩自從
別家來江海信不通宛宛維桑思願從孤征鴻夜夢白
髮親歡咲攜稚童倚門望子歸未歸憂忡忡東臯無良
田何以待歲豐盛年將稱意無為學轉蓬

觀錢塘上人墨蘭二首

蘭以比君子所貴者幽淡黯然空谷中遠為人所欽志
士秉美德如玉復如金篤實而輝光芳騫出喬林偶然
為時出節義凜森森下愜烝庶望上當君王心功成無
所累宿好在雲岑

翰墨者誰子妙年出江關剪湏事浮屠遊戲在雲山時
將騷臣意寫入尺素間嗟彼為形士長往不知還其心
猶有慕豈不薄茅蕝管學古寧為人誠念修已艱聖哲
雖異代詎云不可攀

明月幾回滿

明月幾回滿待君君未歸中庭步芳草蝴蝶上人衣誰

念同袍者閑居與願違

蒼山感秋

蒼山秋意長池館靜而閑雨止脩竹間流螢夜深至皇
義世云遠雅頌日凋弊舉手過頽波誰識作者志烏啼
魯東門泗水不染袂後去三十年直可肩聖知機關繫
風化詞語持細事月落閉虛簾坐夢太古帝揚眉頽玉
色盡發養生祕勿謂仙學難此道可立致

酬申屠子迪

碧月出海底挂在青天中美人如明珠滄波思無窮身
非千歲蓬欲逐萬里風願因紈素衣託向孤征鴻

筠州東都遇雨

高林展夏綠杲日轉城岡四國金石流忽見飛雨涼飄
飄西北風亦復至我傍我行初涉旬去意已傍徨親交
苦滯留川陸一作阻長遠行雖有命期至詎能忘宵
分睇南星命僕戒川航豈無他方願且及顧舊鄉舊鄉
寧非懷吾生未渠央

贈宣掾蒲瑛還靜虛山房

掃地謝塵鞅坐誦聖賢書妙年陟府署退食猶休居聞
子進脩地花藥羅齋廬惟靜故能定有容當在虛而虛
乃非空養之貴安舒苟能克至理德業有將餘子本西
蜀珍西南散簪裾問知其方俗有苦輸華胥教化本自
然匪學故有初況彼聲教敷封疆常晏如清秋武昌郊

氣霧夕方開除誰能不重別執手以踟躕

遠遊

遠遊非吾志偶墮天一角去就亦有期寧能計今昨料
理貧居士守書負西郭清心見古初德宅澤一作甘寂莫
杜門坐春溪綠竹解寒籜雖無清時賞幽意各有託千
載非長生松喬未足學焉知勾漏令不厭宦情薄山中
歸去來朝霞可以酌

述古

天下有大坦人自隱多岐任理忘恩怨何乃累吾私元
氣育萬物雨露豐悴之豐悴雖有恒還復係其資強者
固弗已弱者自有期向者橐籥中竟是誰設施美哉唐

虞聖至治以無為

湖上值雪

農事傷下澤官曹限窮年崎嶇盡所歷繾綣何由宣窗
明變松雪室冷延山煙少歲守恬淡未敢輕棄捐

贈涂雲章將遊江東遂如京師

有客叩門來乃是豐城珍倒衣池上日共語識情真憶
在司臬署任與右司鄰閑門擁芳草幸子時相親別來
能幾何空谷變鶯唇高冠講古義幽抱向人申子負濟
世器盛年宜國賓溪居守經術文藻日清新聖人顯比
秋公道溥無垠古來明睿君當有遺逸民臣欲試或自
致不用無傷仁玉堂吳大夫白首掌絲綸學行表四海

愛賢心直恂念子得偉薦歲寒保松筠飄飄上都門悠
悠此問津黃河動堅冰且度吳山春金陵多美酒事業
百年身酣歌思遠行莫學謫仙人

次韻楊茂才九日舟中作

盛意不自揚君子蘭茝若斜行謾相糾小人比業薄結
髮趨聖軌學至反說約萬殊同一本孰曰混善惡曠懷
感秋晨川陸竟蕭索平生同居者各在天一角招之即
云來奚尚嘆空廊雍雍木蘭橈所歡在春酌止與三五
遇詎被空寂縛貂狐比賤褐藜藿恥大嚼古人輕貨貝
達士重然諾陋巷長蓬蒿吾自樂吾樂

夏夜杜山人本自武夷來百丈會宿

好遊跡非矯古訓夙所欽久違鸞鳳集及此息雲林永
懷西海彥如玉復如金丹霄謝騫舉紫壑寄浮沉不意
故人車間迴南巷淡自承閩州問契濶遂至今良辰得
佳遇足以滌煩襟喬木生夏涼廣池鳴夕琴景會理應
愜況此月下斟緬想改築戒式協山水音但恐忤所性
頗依丘隅箴何鄉如華嵩攜手歸中岑

雜意四首

燕趙有名姝少小隱房惟長大不出戶問今行何為翠
雲高岌岌玉珮光陸離適當仲春節游服展脩眉日晏
珠汗流有馬不能馳衆中一婉孌見者齊解頤徒感慕
思苦自傷昭質虧

棲棲東窗下覽物究玄始妙極領其會有時瞿然喜榮
芳剝落盡年光淡如水東風何處來榮我桃與李中園
含麗思列樹散晨綺自非貞堅姿明旦復飄委盛衰各
有代天運固無已

古來好樂者乃是魏文君樂新不知倦聽古無由欣太
息虞夏世同此正氣分有時感韶濩夢翻洞庭雲平明
各得所鳥獸思其群

粲粲金河水上有垂絲樹青皇披拂之婉孌柔風注雖
當韶景媚物情各有故輪蹄交李下一笑千金顧嚶嚶
樹間鳥爾獨何所慕嚴霜斷野草匆匆歲易暮

歸次雷州答劉文學

楊梅蘊熱厲薄寒亦中人圓形大器內錯迤四時真昨
暮新病已行樂蕪城根扶衰謝近知遂叩城南門殘臘
見佛桑花開一丈春長安多冰雪陌上無遊塵我願有
美酒與子歡相持及亂有聖戒偶醉亦神奇去國悄行
邁未言心自唾幸有前識人在眷采新知先民有名言
來者猶可期苟能念交脩勿用徒傷悲

柳口與張州判復別

放船背峽風野飯維柳口薄雲空際歸盛水煙中吼罔
戀渺回互草樹相紛糾清晨初下瀨瞬息復何有但恐
山中樵還家戒溜久欲為慰旅魂停盃更搔首

述古

朝登崑崙頂舉手攝元氣九州甚博大日月照四裔唐
虞古聖人共絲在廷陞鄉無放逐徒何以禦魑魅

范德機詩卷之二

范德機詩卷之三

臨江 范梈 亨父

古詩七言

贈海康舉進士者

聖主徵儒用文學翩翩五士起海角元戎虎帳飛薦鶚
泮水成材玉新琢吉日舉餞鐘鼓作皇華大夫繡朱襪
快馬鑿蹄輪脫斷相送西風出郊郭問君此行事何若
於菟要是赤手縛候雁南飛不踰嶽洞庭山秋木葉落
詞場先鋒奪霜鏢萬里青山上黃鶴明光宮中問禮樂
董生策有經濟略一朝聲名動河朔往取青紫如六博
前年禮闈開峻擢明當接武絲綸閣歸來錦衣照丘壑

人生無如進士樂嗚呼人生莫如進士樂
最爾高翔步
寥廓

送菊

卧病高秋留海浦明日重陽更風雨杜門不出長蒼苔
令我天涯心獨苦籬角黃花親手栽近節如何猶未開
含芳閔采有^亮以使君昨暮徵詩來凌晨試遣霜根送
畚土雖微甚珍重極知無意競秋光往^{一作}作橫窗歲寒
供憶我初客天子都西垣植此常千株結花年年應吹
帽始信南邦事盡殊願得封培自今日問何處屋萬家
室秋香端不負乾坤但嗔簫管亂傳匹歸去來予雖得
歸念歸政自莫輕違他日采英林下的酌誰向清霜望翠

徵

奉新縣樓對月望浮雲山李八百洞超然有懷

白露浥宵桂月滿浮雲山遙想山中人與我身俱閒
少日曾陪供奉班流浪三千隨百蠻海水接天看不足却
歸萬壑聽潺湲累土成嶽諒非艱蚤服玄英勸大還金
闕玉清名籍在不應猶自戀人間

閩州歌

閩州土俗戶不分生子數歲學繡文圍網坐肆雜男女
誰問小年曾識君古來夜行斯秉燭今者衢路走紛紛
那更誅求使者急鞭箠^{一作}一似鷄羊群古來閩閣佩
歲管今者女工徵六軍雖復太平少征戰設有備豫將

何云去年居作匠五千耗費府藏猶煙雲官胥培克常
十八況以鳩斂奪耕耘祗今棄置半不用民勞竟是誰
歡忻歲歲條章省費煩幸且不省無方殷唐虞在上儉
且勤後王猶復錦繡焚豈有夔龍讓姚宋不言忍使憂
心熏觀風自是使者職作歌雖遠天應聞

奉陪京城諸友游南城尋丘尊師道場作

我本漁釣清江濱三生自是華蓋君往從竹浦拾明月
初向芝山尋白雲聞有仙人姓丘者舊廬正在燕城下
杖藜徐步躡天梯千尺雲門淨如灑門前水流清且淡
朗如石鏡開煩襟中有幅輪碾浩劫多見聽者無知音
高莫高子嵩山之中岑幽莫幽子壺嶠之雲林萬金買

閒不易得一到城市無歸心堯舜之事俱寂寞獨留一
人在丘壑問渠羽駕來仙壇夜夜踈星迷皓鶴我為長
春行興在碧草間白日又欲暮浮雲無時還十年任天
都塵土汙容顏於此意不愜冷然遂懷還一作山更將攜

手上煙蘿曾是軒轅弓劍過我來正值五月半青天漸
少綠陰多每思東山公興來恣婆娑左持玉塵揮俗客
右引綵扇遮妖娥明時豪達盡如此逝且不樂今如何
我亦欲喚細腰舞白馬馱酒金叵羅誠恐道人嗔我慢
空遣弟子來相看上堂椎鼓日色晏孤我青精白石飯
黃金臺前春已歸海榴花發乳燕飛同行佳人莫相違
相思更贈女蘿衣

贈劉山人遊湖南

楚山高高楚水清之子西還復遠行手持空懸寶月鑑
人中到處測公卿楚有羈臣面如削千載姦諛膽驚落
誰能早向太平年識得聲名等光嶽洞庭湖上莎艸生
湘娥祠下鷓鴣鳴與人言必據忠孝豈獨賣卜嚴君平
子言亦是蜀州士家寄錢塘小江涘九野飛鴻逐便風
行色將來泛湖水湖水上幾時來自古生才須世用試
為今人青眼開

搗練圖

深宮佳人白日長夜感蟋蟀鳴中房起視河漢心回皇
雲髻籠鬆分作行清水如天收素練翠蛾帶月杵玄霜
輓轡無繩金井悄邊頭不見梧桐黃裁縫熨帖坐在林
載玄載黃公子裳製成不遠煩寄將但見寒暑彫三光
身體甚適平時康君不見古來邊庭士雪壓關河征戰
多折盡衣裘淚如水

題李白郎官河

當時郎官奉使出咸京仙人千里來相迎畫船吹笛弄
綠水何意芳洲遺舊名唐祠蕪沒知何代惟有東流水
長在黎侯獨起梁棟之材一作材彷彿雲中昔軒蓋南飛越
鳥北飛鴻今古悠悠去住同富貴何如一盃酒愁來無
地酌西風大別山高幾千尺隔城正與祠相值青猿夜
抱月光啼挂在東湖之石壁黎侯本在斗南家枕戈猶

自憶煙霞祇擬將身報天子不負胸中書五車昨者相逢玉闕下別來幾日秋瀟洒黃葉當頭亂打人門前繫著青駝馬君今歸去釣晴湖我亦明年辭帝都若過湖邊安定相見為問仙人安穩無

王氏能遠樓

游莫羨天池鵬歸莫問遼東鶴人生萬事須自為跬步江山即寥廓請君得酒勿少留為我痛酌王家能遠之高樓醉捧勾吳匣中劍斫斷千秋萬古愁滄溟朝旭射燕桑枝正搭虛窗面崑崙池上碧桃花舞盡東風千萬片千萬片落誰家願傾海水溢流霞寄謝尊前望鄉客底須惆悵惜天涯

梁掾枉教冬菊之歌仍韻荅貺

中書省郎梁茂才嗜好雅與時流乖休衙歸來緊閉門戶剝啄或為幽人開屋前枯楊千萬樹屋後官槐傍官路別起新亭翼瓦間畫閣黃花夜吟句自別仙城白兔公采英泛菊九秋同江清木落鴻雁遠我思古人煙浪中彼美人兮無此美不見憂兮見之喜本是千巖萬壑姿如何肯落君家裡昨夜遣詩兒過門挑燈三誦月黃昏更酬迭唱未足報要須共倒花前尊君不見長安富兒買歌笑意擲千金惜年少桃李如今不似春晶子舍

和保貞曜

錢舜舉畫馬歌

錢君畫人勝畫馬安得名
騃妙天下青雲隱約見龍紋
有意軒昂駛華夏國官山立頌而髯朱衣黑帶高帽尖
問渠掌握詎有此牽控寧知人女嫌君不見才士受束
縛往往因之縱寥廓

杏葉黃

杏葉黃天雨霜穹窿攜日照八荒
回光照見白玉堂當堂中美人雙鳴璫
中宵抱被直西廂忠君愛親兩不忘
奈何零露沾衣裳清曉樓頭見征雁
不如謝官歸故鄉

題姑蘇丁氏一樂齋

人生開口日幾何一日所得亦已多
請君為我酌美酒我當為君歌樂歌
堂上仙翁紫錦袍堂中碩人冠嵯峨

瑤池日遲眩五色椿樹春生交萬柯
借問綵衣行者誰丁家令緒如絲蘿
兄弟無故父母存此語未必慚鄙軻
況昔知君在朝列贊教國曹懸瓊珂
當時權倖悉故舊青紫可拾不肯阿
扁舟一去江海遠事實由已非由他
他人束縛我掉手此又一樂信所過
要當高名日益昇使廉如華分如河
歸掩茅齋坐清香松竹交蔭花成窠
丈夫所就類如此劍絕即與浮雲摩
聊題長歌送君去出門啞笑臨鷗波

贈彭生

自來西垣二月吉品裁良士無虛日
上感天子大聖明下知朝政靡闕失
耳聞目見心所然莫此名郡彭君賢

辭官歸養終二親流水二十有四年古人作官計百世
今人動作晦朔計赤面持籌舞銓吏哀哉賢愚同一致
豈知彭君後時寵更二十年猶如至耕田足雨稻刺波
種樹繞天花照地未知義和多少事但願堯舜一萬歲
千鍾有待亦人情尺璧無瑕乃士貴四牡以之不為傷
蓼莪以之不為廢王人若微雅道闕清席朱弦倚三二
美哉彭生淑慶源孝子亦在忠臣門幾人嘆嗟向穹昊
下馬指點銅臺村

侏儒行

君不見東方朔長九尺餘不如侏儒長三尺朝捧一囊
錢夕竟飽死復何益死者不可作飢者食有餘堂堂之

軀天所命生之短者續則悲嗟哉世之人羨彼侏儒復
何為

轆轤怨

門前水揚聲似雨幽人當窗碧弦語東里征夫去不歸
一雙蛾眉鏡中舞年年井上攀轆轤勞心只恐秋葵枯
他家種得長生草梅花落盡青青好

田君寫真

田君力幹成霜鐵一筆能開萬豪傑總是人間敵海愁
但自不忘泓穎別我所思子大江濱欲往致之道路分
安得煩君寫作巫山與洛中有美人予泛江上之游鴻
行巖巔之素雲烏乎此君不可見獨立乾坤淚如霰

贈鄭元澤別

燕京閉門百花節鄭郎騎驢索我別示我高人王右丞
輞川之圖澹明滅一去辭山去吳越寤寐鄉閩五情熱
偶逢此卷即欣然人間何處無奇絕虞生教授司成館
文字精神萬人傑品題一百二十言一言不作溪山說
卿云亦有溪山趣事與虞言當合轍贈朋與親各有義
頗媿紅塵驅蹇拙更欲相留度小春夜溪縞杏都成雪
平旦何以荅畫圖為解臨江雙佩玦

張月梅子昂竹石圖歌

近來海內寫竹石集賢學士有李衍吳興翰林公更神
大抵不令石作板半幅蕭蕭煙霧枝如卷中有千尺奇

洞穴常起鬼神疑嵩華衡岱狎童兒金溪處士清似鶴
攜此隨秋訪秋幽壑我憶為公故寮吏細撫遺書雙淚
落吁嗟翰林今世無一筆猶可重江河湖鳴鳳之下出
瑾瑜高風況足勵頑夫

西黎歌

一十三縣海之州四城結帶相綢繆中有群黎集百峒
耕鑿不知堯舜年憂手扶長弓架鉤箭白馬白似雪花
片此又外黎漸漢習仇殺從前如旅勸春花滿山禾滿
臯婦饋壺漿夫血戰曾不如不識禮教人又誰使之郡
若縣黎霧山高裏雲白哀猿驚鹿夜溪聞下瀨戈船今
已遠行人猶說將軍

掘塚歌

昨日舊塚掘今朝新塚成塚前兩翁仲送舊還迎新舊
魂未出新魂入舊魂還對新魂泣舊魂丁寧語新魂好
地不用多子孫子孫綿綿如不絕曾孫不掘玄孫掘我
今掘矣良可悲不知君掘又何時

望瀛海一首送危太樸之四明兼簡廉訪鄧使君
翰林袁侍講

危君英妙年獨往志千載天馬出名駒空行見風采昨
日銜書到空谷甚欲留之不能待九月開帆指四明要
逐高秋望瀛海海上接天漫漫世人不知此別難當
君夷猶碧嶂嶂日是我對月永夕猿狖啼青巒江樹葉飛

天雨霜江上吳歛思斷腸窈窕徐家兒與女却望蓬萊
思故鄉君行却向三山望雲霧軒窗六鰲上東方雖樂
不可以久留歸厭仙公白雲唱西過錢唐遇順風為拜
湖南持斧翁會稽學士臥雲島朱絃流水鳴孤桐道我
寄語莫匆匆送君有情亦如海海水有盡別意無終窮

重登興真觀小樓

瀕湖觀戶舊倒顛新起小樓明且鮮道人慣養白鶴
飲啄却來堂下眠偶聞使者薄暮至考鼓過鐘吟昊天
春茶煮就且莫試慷慨憑高詢往年

至日行

長安夜半通明光群公冠佩列雁行秦壇三成樂萬舞

布衣類得齊鳴璫小官需次祇自賤當日再拜謝日長
多少朱門園艷質何當起視東方白

得黃太史重碧拈春酒輕紅擘荔枝十字扇面以
歸友人

豫章先生行孝友作書往往心應手想當揮汗臨風時
不在荔枝與春酒竹枝歌中喜鵲鳴食蓮感秋思弟兄
素紈便面大如斗送與君家作千壽

孟先生

孟先生愛青山看山累月出不還蹇驢長笑天地間杖
頭酒壺時取酌身雖飢病多容顏往時佳句動明王富
有聲名無比數先生遇之亦不驚去臥南山紫蘿雨嗟
吾豈是先生徒朝朝飽飯謁禁廬暮歸却向衡門趨刻
畫造化論錙銖但有千載名衆人不知而已獨信非其
愚未知吾師先生先生師吾孔子不師周公吾亦聊自
娛先生獨不得相與於同世雲龍上下遊八區

七月一日颶風後奉和廉訪使

海上颶風久不來一日示我破柱雷乘此便欲歸蓬萊
炎州四時無落葉大木不效軀幹折怪事何止犬吠雪
蓬門土銼雖足憐日月晝夜行青天借爾楚竹洗蠻煙

奉觀許尊府遺墨

奉常許君玉色立手抱父書紅錦襲紛茫蜀令九霄神
扶摘郢州千首濕鍾張雖云世已遠任趙未可肩相及

葉滿天地雨聲急我縱覽之重於邑却憶風雷昨夜顛
萬壑起畫蛟龍螫不然尺素尋常耳何是蕭蕭百靈集
草堂驚怪不敢留至寶豈復能輕酬還君子孫世善收
扁舟歸去一作湖秋

夜上烏巖

扁舟夜傍烏巖宿然火上巖尋古祠老巫輟睡啓神戶
牽幌請官窺儀漢漢家將軍利於鶻征行往往皆良竒
當時光武皇帝聖舉以善馭皆周知將軍再出定窮粵
忠義耿耿光精垂不然夷祀已千載何定至今歌舞之
高縣銅鼓五獸缺以手摩拂增淚悲蜈蚣宵行蛛網結
不識款書何代歲時庭中蕉葉照石面猛虎出谷靈風吹
澤魚導從吏扶掖欲留頗復思深危登臨有客動必戒
況此星露景倭遲獨立蒼茫問橫浦明日江山勞夢思
朱鍊師洪厓丹井歌

城西山相鈎連隔水照見蔚藍天中有芙蓉碧嶺焉然
真人手持綠玉杖瀛洲一去茫無邊谷巖歷落挂飛斗
樓閣崔嵬凌紫煙古松當道石作根松下寒瀨縈潺湲
百花盡逸諸峰前前有神龍藏九淵赤鱗蜿蜒過千尺
四海豐登長晏眠堯舜在上位佐命皆惠宣豈如秦漢
王燒丹學飛仙白玉之牒黃金編樓船美人去不旋窮
極耳目欲思比松肩焉知清靜化乃可與長年

古杉行

丹陵觀有古杉屹如雙闕當雲門云是鍾君之手植君
去此樹餘空村尾搖翡翠梢八表根結蛇蛟行九原幽
邊豈無鬼神護溪處直形天地恩一方折裂引穿溜猶
是百年燒火痕蒼皮樹裏漸欲合始知草木有道存或
云下有丹火伏四時地底皆春溫神還復壯此其驗疑
是自此無傳喧平生政坐嗜竒古來看適值寒冬昏長
歌沉思逸其下夜半月高松露繁飄搖葉縣是馬影牢
落豐城龍劍魂何當喚起博物者共騎黃鵠凌昆侖

題皮野逸亭

方丈新亭隱叢篠下有長風蔭清沼林間白日漏游絲
空外青煙送飛鳥人生百歲今半之更百千歲將奚為

麻姑自是好風骨按行蓬島歸何時

大別山禹栢圖引為安南陳平章作

即官仙人業竒古頃騎黃鶴朝帝所示我山寺古栢圖
霜枝半作死龍虎何所樹之大別山復奚種之曰神禹
何浮屠居而是栖禹宮故在大別下何悴而敷北面榮
榮悴實非何寒暑荅云足徵有此畫志者眉山蘇父子
交州賢王更博雅遣客描模肆傳覩昨朝走馬過衡門
命為新圖徵後語我思夏道日已遠去迹茫茫九州土
自從塗山玉帛分攻戰流連血干櫓三光動盪五精移
元氣根株猶爾許胡然一物玩萬變撫事令人淚如雨
返君圖畫心始休再拜青雲漢之渚我拜非徒重所聞

重是前王封植勤方今天子育庶類至德洽於三代君
於乎極知此栢當更久六丁冥冥慎汝守

奉寄翰林鄧侍講

曩承持節江之東騎驢再上蓬萊宮蓬萊仙人歌白鶴
聲落五湖煙雨中世間爵祿不易致何獨去就如飄風
朝廷禮樂湏制作六經隱義資發蒙論思廟堂集耆碩
啓沃寧讓前諸公閉門讀書古都市四輩冠蓋方隆隆
我生生長在窮谷那有文字爭人雄謬蒙引譽百僚上
負祿府署慚無功一別十年還又五昔者少壯今成翁
誰知復客七閩下隔二千里來詩筒羸軀頓醒瘴癘惡
賴以慰此心忡忡粵王城南浪自白粵王城西花正紅

寒禽

三兩幽禽抱古木東枝孤鳴西枝宿豈不念東鳴與西
宿歲晚天風破空谷

范德機詩卷之三

范德機詩卷之四

臨江 范梈 亨父

古詩七言

奉題先天觀山水圖

學仙之人與山為徒住在台廬之與江湖之區張公鍊
丹作龍虎丹成御氣游六虛後來出者絕代無復有一
人住玄都玄都之壇角井孤上摩萬里之黃鵠下伏千
尺之飢飈陰森檜筠自太古斬種力與開闢俱扶桑朝
暎挂絕壁坐見觀閣青模糊壁崖控弦瀉哀壑春雲秋
露芝田腴我亦人間山澤癯偶陪時髦賓唐虞有醉時
一醉黃公壚振風三日撼不蘇折花不得渡弱水揮手

始識仙凡殊玉堂學士危與吳遺我茲山之畫圖尋窗
數戶久嘆息無因置我雙撐菡獨行幽人不受呼掃葉
青磧聽啼鳥日暮蘿徑相縈紆相縈紆向何處明朝為
借麻姑鵬我亦騎之上天去

釣臺歌

吾慕嚴子陵隱居富春山故人乘六龍身隨魚鳥閑羊
裘大澤雲在須忽來導從入皇都掉頭不受諫大夫高
風逸節何代無慎勿滄浪輕釣徒

首陽山圖

山漠漠予谷逶迤中有二士形容飢問之不荅告者誰
在昔父死人致國弟讓兄辭俱去之一朝隱居北海北
去亂就治歸人師遇世偶有戰伐事叩馬垂血陳愧辭
君王知名臣義直直不退聽將疑為見兵不果事乃定
恥食其粟隱於斯終然飢死茲山下到今稱頌猶當時
白旄黃鉞不可追功業甚盛德甚衰救民水火事誠危
三綱一失誰扶持是以聖人表其怨謂彼仁者良由茲
首陽之墳高幾尺自古富貴埋沒野草空累累我欲酌
北斗薦以黃金卮展圖意漣洏此意畫者宜不知

贈余相師

幽人本自居丘壑悞上青天養黃鶴長教四海不知歸
幾見珠玄雜花落厭原山中逢遇余君語余世事徒紛
紛書眼猶如牖中日宦情正似嶺頭雲

張明德經歷松石圖

張君畫手天下奇，往者京城曾見之。濟南參議最博雅，每為送酒題長詩。溪山大澤生喬松，緘封寄我章江湄。問君安得致此本，吏牘政類麒麟羈。又費臨川百日假，不爾能事何能施。澗阿無人白石爛，飛泉但見下連漪。老夫對此神慘惻，况近歲寒霜霰垂。高齋展玩意未已，便欲共赴青雲期。搔首絃歌白駒操，悠悠四海將誰知。

二韓詩為韓吏部作

太行青雲城上頭，城下亂水亦東流。誰家煙中楊柳樹，鳴鳥一似黃栗留。是時東風蕩瀛洲，瀛州冠帶集英游。有客抱琴來海岳，罷彈為我誇韓侯。韓侯家慶邇晉始，

異代風流尚能耳。九十丈人任丹丘，猶子類翁翁類子。一門兩世百八十，更問千年今有幾。余係生子子生孫，錦衣爛熳晴空裡。我向瑤臺聽洞簫，靈風浩蕩迷宮徵。桂枝翠弄月光寒，一時秋滿芙蓉水。神仙中人無俗賈，說似青天天為喜。往年初識吏部君，吏部有子才絕群。與我同僚內相府，給事朝夕均勤勞。是則知君莫如我，作歌盛德况所欣。皇都二月花紛紛，美酒斗值錢萬文。把酒欲醉春日醺，為君却日呼流雲。此歌此事今罕聞，

懷舊游贈別杜君還益津

往與羽人曾結滄洲期，醉騎鯨魚躍天池。北走幽都摩碣石，所歷至今皆見之。澤國波光秋激灩，津亭月色曉

參差山夾踈鐘和雪度樓栖斷角引霜吹蘭園坐送流
鶯亂華觀行聞任鶴悲別來幾度斜陽裡平曲風煙勞
夢思安得狂心化為浪去隨流水到天涯偶向燕城同
杜子為我立馬歡相持自言家在碣石西易水清漣漪
易州風帆日日至佳人何事重來遲重來易遲去易遠
便欲從君川路返歲年冉冉思無限詩成雁過雲濤晚

用韻酬劉秀才

弱冠從游狎山水三十餘年屈伸指南隨粵鳥北燕鴻
祇今甚矣吾衰矣學問無成不了事况望清名昭書史
得歸重賦茅屋春青眼相看賴吾子丹鉛曾近更生閣
但惜案頭螢亂死世情浩蕩何足云高人不厭席為門

百丈山前秋屢過九州外事憶重論昔傷萍梗流滄海
暫喜梅花侑翠尊制古直須追左契聲英必合紹前聞
昨朝示我清江作洶如壁壘瞻風雲媿我徒當大敵怯
此陳何止摧千軍流離天驥志遠道悲鳴往往思其群

留諸生

凌晨風雨踰山樹把書對酒聽鳴扈牡丹初茁柳新芽
復逐春光向何處元舅曾聞白水誓婦翁更審清水譽
二家姻好信無匹四海交游加有數我於卿門誼不薄
况此阻陜泥中路元宵只在數日間天氣未佳須少住

凌雲篇

往與凌雲山人披虎豹謁太清是時東風滿瑤京綠楊

三月聽流鶯君隨挂席湘江行予亦騎馬趨承明手把
宮袍厭縛身却憶南溟有縱鱗四年辭海岳一舉上星
辰逢君却向凌雲下心上經綸甚瀟洒半夜清猿四合
啼長松古月照回溪桃花源上路一去意都迷我本凌
雲峰畔客何日相從卜其宅早服還丹生羽翼共脫朝
衣挂青壁

舟下龍舒望九華有懷秋浦守集賢周使君

長淮初四月照見九華山不見秋浦人使我心忪然昨
者蓬萊闕下相周旋白雲冉冉招歸船余亦泛海追群
仙未知成道何因緣可憐柁頭月只尺成胡越安得馮
夷半席風疾似南飛寄書雁從君今夜過江東

小孤行

小孤有石如虎蹲西望屹作長江門洪濤萬古就繩墨
雖有勁勢不敢奔大哉禹功悉經理何必有志今能存
大者為綱小者紀不徒百谷知王尊靈祠正在石壁下
我來適值秋風昏明朝東行弔碣石更與尋河問九源

張吏部宅山水壁歌

高堂秉燭見翠微巖屋突兀當兩扉庭前繫馬霧露集
老木倒挂藤蘿衣問誰妙手能至此筆墨簡古世所稀
天官主人為我言翰林供奉精天機憶我尋山客南粵
地暖四時皆芳菲眼中得此了不易便覺宇宙揚清暉
旅人獨行歌采薇滄洲茅屋何年歸安得峰頭置一作買

雙鶴相逐蓬萊頂上飛

贈李山人

平生慕事華蓋君四海孤踪隨白雲峨眉山人住盱水
駐馬重逢帝城裏別來相問意悠悠北走南飛又幾秋
昔向貴溪尋講鼓又從薊郡攬征裘展圖示我青山屋
山在盱城小江曲東風日日蕩人歸明發行歌載黃鵠
憶昔上帝救游華子岡中道勒回俗駕賓炎方是行倘
或如私願華子岡頭定相見麻姑應解索題詩碧桃花
發報人知

己未行

二年六月己未朔京城五更大地作臥者顛衣起若吹

起者環庭眩相愕室宇無波上下搖乾坤有位東西却
自我南來覩再震初震依微不令若昨朝展席坐堂上
耽玩圖書坐無覺堂下群兒又驚報方饌饗人喪杯勺
櫛者倉皇下林榻門屋鏗鏘振鈴鐸祗今猶自騰妖訛
旦暮殊言共郭郭大家夜臥張穹廬小家露坐瞻星落
焉知怪變不可屢安巢盡有一作南飛鵠昔聞上帝憂
瀛洲親勅巨鰲十二頭特為群臣舉首戴萬古不與水
東流豈其九州亦類此此事或誕或有由上帝甚神吾
甚愚戴首勿動心優游

次韻賦吳尊師漱芳亭白紅梅花二首

梅仙之宮在何許五尺青天隔風雨冰雪肌膚綽約人

鐵石心腸軟媚語行藏一粒粟中寄品格百花頭上數
所以高廷和鼎功大獲登之六代舞烏乎安得東皇錫
白社昨以金陵為爾土

惟梅本是羣仙侶別有芳姿照微雨人嘗誤作杏花看
我亦戲作蓮花語即色非空還是色遽數不終須悉數
偷服丹砂忤玉宸頽顏謫向春風舞烏乎安得東皇錫
赤社昨以朱陵為爾土

贈陳兄一作九

侍御諸孫美絕儔辭我遠行遊桂州道路炎暑正足畏
山水清涼須暫留昔我效官滄海上歸棹春前拂青嶂
極知茲郡煙景樂欲往終然背晴浪送君此去倍傷悲

夢寐梅花雪片時故舊相逢憑問訊何時重與覓安期

奉酬段御史登岳陽樓之作昨分理盜賊至海康

誰能手鋪湘水平刻却君山看洞庭昔人已騎黃鶴去
樓前亂芷春蘭青豈知繡衣後千載遠違鳳闕來江城
凭高弔古落日紫領客置酒開雲屏酒酣點筆賦新句
薄海傳誦令人驚憶我初游白玉京與君聯步趨承明
手宣皇猷敷帝績濟濟學士如登瀛一行竟隨萬里外
回首滄浪思濯纓守官區區事無補惟有白髮欺人生
样柯水外萬竹底四時鳥語煙邊鳴忽忽此地復相見
恍如幽夢求仙靈中宵秣馬不遑暇君又北鄉予南征
如茲後會復何日念之使我雙涕零宮中聖人總四溟

所過海岳思澄清鐵冠峨峨望天下青霄快展皆脩程
由來豺虎伏仁獸況有鷹隼當秋橫明夜相思隔雲島
月落高臺聞笛聲

贈荅楊顯民四方采詩

今人論學古人詩事皆天者非人為文章由來貴實用
爾雅但顧有法何妨竒六經固已殊緩急樂子飛騰自
茲入國賈寧懷大寶疑宮工肯效緇微泣志至言從意
自足何必王風繫流俗觀變時時到泰離宗周思近西
郊哭十道使者明如水問閭盡在冰壺裡觀風本是使
之職太息幽人為之起昨雨綠苔生晚閣黃菊花前共
秋酌采采芳英不盈掬日落樹聲連萬壑去去牛馬汗
如泉既別勿計歸來年治平之音斷可傳無庸使我心

煩悵

題冷架閣原圖

曾泛修江入海昏更數百里緣人村道至常州四晨夕
猶未遂得窮河源山_人世世原上任示我畫圖聯秀句
安得移家向碧峰釣磯長倚沙頭樹

蕭鍊師

若有羽人吹洞簫拂手不拾松門樵身披破褐笠一瓢
獨攜雲霧通青霄幼曾逢人越領椒教襲造化為科條
坐致雷雨不終朝罔兩不懼持斧燒其徒夸者長嘒嘒
時夏汗流金石焦山川走走壁走乘輶大巫結舌小巫

嬌但見宇宙行宵翹人謂蕭師眼神僚胡不試手須人
邀師乃含思坐中宵謂患不禦猶助妖便以誠意荅神
調至期發號從不驕閉門赤脚飛招搖白鬣倏忽朱鱗
超赤日卷上青天潮四郊泠泠蘇旱苗列缺一去天迢
遙喁噉曲士慚顏銷何且坎鼓更煩囂爭以俎豆相呼
招誰知玄功坐不要師方斂手歸雲寮臥聽流水鳴朱
橋采詩觀外給空謠我負師約秋光凋昨暮敗葉西風
飄相思無由警岑寥我作詩比鈎瑀誰其和者以報蕭

登君堂酌君酒為張氏敬順堂賦

登君堂酌君酒願君有親千歲壽有蟠者木嶷彼堂前
越女能舞秦女能絃羽觴流月翠幙張天粲粲在側羅

列庶鮮登君堂酌君酒願君有親千歲壽昔屈生去美
君子貴之鄭莊徇愛終悔其為先師遺言戒爾從令至
孝有道豈不在敬酌君酒登君堂願君有親千歲壽歲
歲壽且康

贈別清夫還吳

新雨不作泥鈎輶樹上啼征夫懷遠路家在太湖西別
家今幾度楊柳江邊樹念鄉車輪下漸是中年路萬事
中年尚可期人生且莫長別離長別離向何方九江落
花清浦香玉睢斑斑鳧乳黃南望不見三高堂奈何游
子思故鄉我家諸公濟時早功成身退合天道當時未
必知者賢挽不迴之卧煙島後來閱盡虧成事始識從

之去時好我不能赤手縛虹霓又不能委身同草木生
逢堯舜世肯受泥塗辱昨者悞奮龍門雷螭涎朝之自
云足憂來舉觴酌白日唯有皇天照空谷張公子吳江
生我有千載意不羨身後名為君寫作贈行曲曲中鏗
憂難為明君行不聽我意平明日買船棹秋聲亦欲東
下窺蓬瀛飄然始去白玉京須臾禹穴來相迎相迎未
見須相待客行雖遲心未改

城南諸園觀牡丹

燕然牡丹絕世嘉名園是處列如麻清晨步騎醉暮歸
胸中稍得一萬花青雲長銜若木日綠水亂泛天台霞
神功天巧奪心目依稀半在侯王家欲持此花表衆芳
斗大亦有敬與斜堂堂不動吾所敬似者何得爭豪奢
我從年少過花下雖有車馬不敢詳未知時人作意否
俛仰宇宙思深遐

奉和效古意醉歌

憶我初年三四齡當客唯對聲泠泠夜誦漢賦一千字
朝來千字仍心冥自許英年逼華蓋豈信流光不相待
祇今四十少二年坐念立志足悲慨我當贈君金縷羅
君當答我黃鵠歌吳南水遠春似畫欲行未行可奈何
莫使風雷寄鳴鋏莫嘆羊裘隨煙雪人生萬事如春花
瑠花雖晚君須折

二月欲半春風顛對食廢食心黯然排沙蕩石忽到眼
須臾几席無光鮮昨朝出門吹欲倒乘黃不病不得前
百圍大木拔莫動決折斷幹追烏鳶驚雷萬車碾空過
條歛卷地散百川未知何自蛟龍怒坐使老屋如流船
先生老屋十五椽寄任主人從昔年崩騰直為居者惜
過客東西何用憐幸自環堵無足樂屋雖朴陋形製堅
但念素衣髮如漆白黑變盡思歸田勉焉守之勿易地
會且風止天清妍君不見古來列禦寇御之還得同飛
仙

送蕭二十兄

東郊蕭條生事微快馬日日趨朝歸黑頭游宦吐梁肉
青眼高人歌薺薇儂家旅食強甘苦何物俗流輕是非
百歲乾坤消屐屨三江風浪隔庭闈柳根臘雪春猶凍
沙上晴雲暖更飛昔擬此時具吳榜送行何故不沾衣

雲林歌為貢供奉作

朝望宣城夕企雲林埽花釣月清我閔心城東之山倚
天碧手捫南斗近只尺幽人築堂面山坐絕似謝公舊
時宅謝公今何在蒼苔翳行跡調笙誦新詩流水照白
看石水作明鏡年光靜來往夜淡敬亭雨坐見南湖長
清風被長阪一作鳥度菱葭響雲之林子不可攀中有
青猿白鶴相盤桓林之雲子不可縛時來宿我青簷端
昂藏老仙人抱劍臥山側憶在中華時相逢髮未白問

之不笑亦不言阿家仲子瀛洲客却起遺我寶字書依
稀攝精鍊魂魄相期後天無極年共爾守之合自然專
氣還得同飛仙未登雲林堂試作雲林歌嗟我久客意
衰邁雲林雲林奈若何

芝山歌

自公習隱華山丘園公既未相清乾坤三光迴明五秀
闕儲靈肆啓忠孝門昔在至元侍潛藩出佐刺史窺江
源二十年間躡台輔即復拂衣辭紫垣憶昔尋真度海
岳騎鯨相見芝山根手挽仙人綠玉杖頷笑為之顏色
溫芝山嵯峨熊虎奔屏風百疊翠波翻青天芙蓉翦秋
水高堂宴罷浮嵐分醉陪藜杖陟山榭桑麻被徑松滿

原此時細矚方外里但覺泉石多深恩帝思舊臣振顏
弊下詔明言徵吏煩使車日歷林澗曲復攜白雲朝至
尊觀公出處握至要自許當有古道存方今明堂力更
化頗陋周漢追堯軒蠻夷來庭百辟享聖心正欲嚴天
元黃鐘九奏樂萬舞廟薦無日無受膳大脯精神蓋六
合民物自爾能豐蕃功成次第勒彝鼎歸去款委尋笙
尊此是英雄千載事慎勿輕與常人論只恐門墻少壯
客白頭猶是芝山村且持此山為公壽願益公壽如崑
崙

奉和李監丞醉贈羽人之作

自從墮地愛名山五岳尋真去不還青山無津度日月

旦暮御風一作氣行其間九江西來赴海門中有道路古

來難談笑解入蛟龍腹脫此命與松喬班吾嘗左揖三

茅君右手直接高飛翰至今空濛偃翠蓋望雲懷我雙

佩環君從茅山來青衣白霓裳肝膽出古劍刺裁光甚

揚玄元皇帝雲與仍李武昭王稱世舉德朝未央偶吹

龍笛過九市共君斟酌北斗傍浪傳北斗不可挹酌之酢

以白玉觴百觴未已已復醉援此織女天機章舉頭目

送南歸鴻我自滯留君遠翔眇眇美人絳珠宮絃白雪

子歌清風浮萍流水相遭逢何獨不在岐路中何獨不

在岐路中相思昨夜春釭紅

官河曲

官河人世居河水邊嚴冬二月河水堅饕厨待汲烹庶
鮮朝朝投壺先衆女十指凍隨貂金蟬今日出門又苦
早行人爭惜少夫憐鑿明知鑿水難得水上堂養姑欲
姑喜

元城曲

元城郭使君愛母不違養刻木貌慈母去官西山漬上
堂示甘旨下堂候寒温人見使君孝作書細討論我論使
君政亦由孝所敷虞周雖已遠此道今幸存嗟乎使君
天壤何茫茫此道誰與期天雖高孝心本自達天聽地
雖厚孝心當有徹地時何必邦人子弟能化之致之家
國天下皆爾為秋風吹庭樹樹葉秋如雨秋樹則有枯

烏生長顧雛

范德機詩卷之四

范德機詩卷之五

臨江 范梈 亨父

律詩五言

奉酬冷架閣休居見寄及與令弟游清水巖二首

翠谷栖遲在丹霄結構侵豫章天地德棠棣歲年心靜
日尊中酒暄風席上琴采芝端有約未老得重尋
迴野飄晴絮高亭接晚芳遠違長日在嘉問感情傷振
厲文章氣沉潛道德光尺書千萬折陳義可能忘

游大梵寺登秋屏閣望西山次王掾二首

城陰散珂珮梯徑上煙蘿使者車調輅仙人弁擁螺隨
花思緩步折柳應長歌賴倚賢賓佐從游共琢磨

初陽啓梵亭古檻俯漁汀句就輸心匠爐存示德馨
蛟深水府游鶴遠煙屏萬古塵沙盡千秋翰墨靈

即事

隨地居能勝因人景倍饒折風疏菡萏移雨近芭蕉
放浪明高蹈留連近久要虚心待世慮已任過雲飄

過峽山寺

飛來何代寺重過念孤踪木葉鳴秋舫金人坐晚鐘
去留元不礙喧靜若為容記說號猿黠知藏第幾峰

答陳愈之

全族歸時論英人振德音松筠存大節蘭茝出深林
韞匱知藏玉披沙喜見金王風顏已久尚敬法森森

淵明醉歸圖

閑居得名酒遇醉即頽然為問號呶起何如爛熯眠
鴟夷松影外蝴蝶草香前邊記得衰榮事醒時莫浪傳

蘇李會合圖

未識沙場苦空曾奉使來詎知羝乳約不抵雁書回
漢節風霜古胡笳旦暮哀誰憐太史令心為故人摧

聞袁侍講上

由閩將泛浙未到忽傳悲便欲雲中覓終成地下知
天光虛劍匣海氣颯書帷舊事交游輩誰當寫墓辭

百丈晚望

樵舍蜿蜒落仙峰歷歷尊鳥回脩竹寺人語夕陽原地

覺心多妙池參性不渾欲歸長不定既止復何言

夏日園林二首

古樹當江合晴雲拂檻開游魚依碧荇鬪雀啄黃梅
接山公載還因賀監回來與年去得任故人杯
藻井泉通口莓墻日隱腰托身非故里竊祿是清朝
宦學真何補漁樵幸見招信書寧自悞坐起敬唐堯

浦翰林家萬年松

雖云小草志已負大年馨失水曾頻槁非春即自榮
古煙勞遠寄細石伴長生偶識靈芝下棲遲倍有情

和辛編脩中秋玩月

道路何時短星河此夜高山浮白玉兔水動紫金鰲待

養湏萍實排憂憶桂醪明年萬里棹定照九江濤

寄甘州吳二奉禮燾

去乘西極馬萬里看流沙伯父當周翰即君比謝家
殊方翻事簡新學與年加記取燉煌俗歸來種美瓜

清明日懷雷州

今日清明日殊非異域春祗疑衝雨客猶是望湖人
柳狎鶯求友花交燕卜隣未厭酬節物思遠獨沾巾

六月初十夜雨止玩月有感

雨歇青林迴虛齋坐夕涼簾帷方度月枕簟已懷霜
地角客何在雲端路轉長慈闈近安否歸覲不能忘

雨後寄懷李宗伯待制

一雨洗煩暑城隅秋氣高閉門淹簡策開徑理蓬蒿不
怪經從少應嗟出入勞扁舟雖未就歸思滿江皋

送任德淵尉河東

瀟灑河東尉揚舲此問程一官居衆後百里為君清郡
縣殊秦記風煙故晉城寄聲西使者廉薦必高名

壬武子相馬圖

偶然來廐吏喚作九方臯毀譽依名立周旋逐物勞神
馳風電足眼冷雪霜毛事有遭逢者騏驎固自高

至日奉寄盧脩撰

此日足吾愛餘生任爾催極知春在望勝喜客能迴度
酒迷隣竹搜詩渴野梅同僚更同好經歲不曾來

延平江閣

山勢抱重險津流合衆源詎知從事劍不類大夫魂光
彩潛猶見精忠死尚存幽靈如可問吾意豈忘言

八月十五夜

城上初聞柝天邊獨倚樓可憐今夜月還照異鄉秋燭
暗頻移席簾虛不上鈎回文錦機字寫得大刀頭

風雨

風雨忽如此空山方晝眠故應為計拙可復要人憐燈
火鄉村路桑麻杜曲田悠悠今視昔把卷一茫然

寄朱鍊師

仙人江上館帝子閣前村一去無消息三年廢討論雲

深燒藥鴨水近種桃源惟有清風至時時為掃門
蘄州城下晚泊與土人語及西方事平有喜而作
野闊秋無際天空夕始涼漁船下浦急舍火入雲長洲
遠懷鸚鵡山危指鳳凰戍人新斂甲垂老幸時康

黃州道中

徑轉山仍掩沙移圃自成蒹葭連水白楊柳蔭門清無
復論餘事真堪了此生眼中陳仲子九鼎一毫輕

贈孫秀才

四海孫思邈雲仍復盛名白駒空谷遠黃鶴大江明子
去何瀟洒人知盡老成特來容貴近次第取公卿

舍前龍骨樹

島夷薜蘿落見誰種此江津結榦多於葉成陰迴不塵取
材因惡剌一作感事撫長身安得艱難際相從作四隣
百丈山中夜坐聞謹思將還憶甲寅入南中正此

日也十二月二十三日六首

近得雷州信遙聞弟姪來江山淹遠望天地保疏材鄉
為魚羹起今寧馬豆猜殘年有心事未省定寒灰
欲雪翻成雨何天恰吞晴情似緣春在近故與月爭明
谷樹行行暝川川雲冉冉輕往年當此夕孤棹適南征
歲月嗟匏繫乾坤信梗浮蹉跎迤越鳥迂闊問吳牛正
道曾無弊旁觀各有由聖人如可起吾欲詰東周
斜谷驚風合空塔墜溜鳴燈昏時作暈漏遠不傳更但

得林間趣何須谷口名是誰超物外不用計浮生
往備清華賦寧知獲落心槐街春日盛杏省午煙淡出
試終何補還歸敢自任祇慚山澤吏空受二毛侵
客行身萬里家在地中分爵命優臣子江湖遠聖君夜
瞻龍虎氣歲出虎狼群舊故無消息低回瘴海雲

壬戌秋錄因晚行寧州道中追錄

曉發高平鎮前旌路未分小橋煙外過流水月中聞虎
豹宜多隱豺狼不可群居人敵炎暑報有竹連雲

寄題嚴氏樊川別墅二首

先生天下士小隱郭東村
麓水緣開徑楹山對掩門
土風寧近洛川姓不離樊樽
俎心雖間衣冠口已喧

亦欲西流去相尋素滌邊多應百年術少見一人傳
生事空芝朮心期托蕙荃
明當詢大藥畏子不論錢

數日跋涉泥淖至北山始霽暮經鄱陽湖

川路遠長林歲窮千里心
賈舟棲港近樵火出村深
欲雪應消瘴因風忽解陰
轉移足清景難受客愁侵

寄謝董簡卿

高人北斗下遂與世情疎
悵望九霄鶴攜持千里魚
風雲今邇只泉石後何如
詔讀須中密無疑未見書

步畦

白髮榮中將清晨步菜畦
祇言無所事寧復有相攜
日靜聞禽語泥融散馬蹄
讀書不解俗猶自負幽棲

引兒灣晚泊

席壓波心正舟移岸脚斜夕陽明細霧秋樹擁荒葭問
道獨如夢懷京却勝家客愁不自整更苦暮啼鴉

秋雨寓舍酬荅夏編脩四首

亂竹通鄰舍脩梧限掖垣日長惟有雨秋半祇如昏野
色愁俱破河流畏更渾唯應好僚友孤寂義弥敦
左丞京下宅太半貯蛩螢容曳栖烏地披爭卧鹿場幾
時衣定暑昨夜酒生涼太息時人語依稀不可莊
平生談笑口未是向人慳直以朋友內難為伯仲間陳
君元下榻賀老自懷山見謂前脩事因之一破顏
倚巖推許遜負水揖文蕭萬里初鄰並長年此寂寥不

要麟閣畫虛累鶴書招同是西江客君當結夢樵

九月十四日過紫極宮熊道人房

曾軒俯江竹敬枕對連山雨止煙霧集洲回鷗鷺閑紫
霄行有徑白日戶無關但見空中侶飄飄不可攀

九日諸生攜酒至城東看菊

楚楚臨堦菊重陽特地開慰人良有意報汝愧無才巷
杵聞鷄發鄰觴送蠨來采英吾欲寄悵望倚江臺

閏除日仲淵宣慰傳之廉副俱出山南暑夕有懷

無由傾倒

舍下初秋至明月出雲端清輝延細竹爽氣集幽蘭江
漢不容越方舟逝良難瑤琴誰起坐中宵為我彈

題山居圖

平湖含白水斷岸見青林
籬落初秋氣雲山向夕陰
養閒祇用拙避俗更懷淡
為問舟中客何如澤畔吟

社前七日作

久早春始雪社寒猶未妨
沉沉鶯待木語語燕歸梁
靜想親交絕儀求旅處減
以身觀萬物應繫末輝光

奉訊浦編脩

聞君踐馬厄詩賦日應多
但倚文為命焉知病是魔
蒲菊深巷雨菡萏遠湖波
未始無相憶經過奈禮何

送譚殷卿歸徽州

送君從此發何日到徽城
以是夕螢亂況堪秋雁鳴
行

藏無定策任養最關情
見誦覃懷守名家舊有聲

題贈李右丞

恂恂李右轄行義古人期
緩急倉公傳勤勞衛母詩
滄波大地轉白首老天知
莫寫青田鶴鳴臯重我思

晚過孔奉常舍下

滄江一萬里書信近如何
向暮客懷薄及秋鄉夢多
故人相慰藉並舍數經過
但願長無事彤庭接珮珂

悼遠用友人韻

采江莫采蘋思食莫思蓴
間歲曾為客經時獨夢人
林園花動夕帷帳草留春
萬里燕山路空懷涕泗頻

酬孔太祝

蘇郎懷印綬不計弊貂裘一去青山下三年白露秋關
心悲地隔涉患見天游笳管淡無那看時動戍樓

贈別朱生為南海醫教得問字

此首悞編
當入五古

拜命辭中闕鳴簫下南郡天晴木葉空江暖梅香近解
鐸風成陣開堂月生暈欲酌扶胥碑移船定相問

贈別李教授亭赴五羊先往餘饒觀省

行色動西風鄉心去任同諸生五嶺外之子大江東且
羨還家鶴無愁度海鴻若逢天上使書記莫匆匆

贈別徐教授之欽州二首

徐子雅好易白頭來上京如何來懷檄遠竟往教專城
山近煙霞客江澄瘴癘清朋游政事少況在仰修名

冉冉歲月暮悠悠閑塞長歌鐘凝旅宴舞袖拂征艎到
日梅花亂來春蕙草芳南金自昔重寄贈可能忘

移居東城

移居古城裔桑竹似村墟已謂丹霞近無嫌白日疏天
晴時見鶴池淺尚通魚賴有知心者過門亦下車

十二月五日雪荅傅淵道

薊門臘月雪初似楚南寒祗悅年光盛寧愁旅宿單濡
毫思謝朓掩戶憶袁安昨暮瀛洲暑應當策馬看

王繼學晚過舍下翌日惠詩兩章用韻荅貺

平生病太史淺陋愧曹邦自足封函谷聊須壘受降黃
鍾和知寡白壁動成雙天外誰招得清風滿八窗

客居惟所適不是遠時人聞喜池臺僻來依第宅新月
涵鐘警夕風引釀生春頗得過從樂相看莫厭頻

和二章已而徵者適至戲用韻為再疊云

久客歲云暮悠悠念異邦病因詩暫愈愁為酒先降屋
隱踈篁半城依老樹雙晨朝有好鳥命我隔東窗
頗怪君家使徵求太迫人從知心匠苦况復歲華新輟
夢天開夜思歸水墅春縱無青玉案寄贈莫辭頻

用韻報李宗明

李侯持重器隱若一雄邦敵至嬰城守威行走傳降薰
絃須製五古劍肯埋雙見說研朱地車聲繞碧窗
古來輦轂下不畜隱淪人况有龍門舊寧無獸錦新江

山政如畫松栢自宜春可是東城曲過從步屨頻

送張月梅

臥病空山裏君來起素秋叩門驚遠字扶杖揖清流潦
倒收梁客從容樹橘侯偶同螢夜語行李又何州

三月二十三日雨中示諸生

後園僧寺裡聞有蜀葵花好趁今朝雨移來向我家編
籬雖待菊引蔓盍藏瓜總在經營力秋成莫浪誇

贈別李太祝還廣平省親

六祝周遺禮千官漢盛儀聲名無此達少壯任君為孤
戍程雖迫萱堂拜恐遲都門四月別愁殺萬黃鸝

贈荅吳二奉禮

新詩走風雨感謝老兵來藥圃昏長樹柴門靜古苔
晴鳩狎喚怯冷燕頻回解說銷愁事何由斷酒杯

登南城樓

樓倚晴空外登臨延賞心微風孤雁過落日萬蟬吟
客路侵齊樹鄉愁接楚砧為詢宮外筑流水似哀琴

寒食後百丈山夜坐

已新寒食火更近暮天鐘花片隨風滅柴扉帶月重
以閑酬宦達將病抵心慵本不從耕稼臨江媿老農

月出

清風起夕陰明月出高岑達識衰榮理淡齋去住心
夏蟲先振砌昏鶴未休林不有詢奇字應誰載酒尋

山壽生日

見爾開三歲堪余謝一官常憐為子重更念報君難
曷日勝裘馬于天學鳳鸞終當慰老眼空濶萬人看

九月二十八日濟上作

昨日立冬雨內河中夜雷晨興猶未定震懼忽如摧
衰柳並寒在早梅何處開飢年方禁釀不飲稱無才

快閣延望

快閣延江望清尊息坐彈風鷄猶戒曙雪雁每辭寒
莫使晨歌廢聊思飽食安百年會有故終不媿儒冠

題秋山圖

我愛秋景好自緣秋氣清江空石露骨木落風無聲
偶

向畫中見猶如雲裡行外祇疑豺與虎無地得縱橫

正月三日大雪

大雪生何處飛來應早春清寒微著物光霽亦宜人日
月雙吟鬢乾坤獨病身濁醪差可近祇為有天真

康大監善慶堂

大府聲名舊京華有此堂棟梁淡盡制花竹淨分行世
美尤當濟身名賴必揚自公常退食把易細焚香

九日和危太樸見貽

年年江海上飲菊對重陽又復茲辰至都無少日狂遙
峰棲戶碧敗葉擁池黃只有長生事于今墮渺茫

九日簡危太樸

疾風吹細雨忽忽過陰厓久喜江山靜新增節序佳秋
聲連迴野冥色起高齋自得論文侶中年有好懷

夏夜登後亭

縣酌群山置亭因古堞安幸無多檢校于以小盤桓潦
倒淵明釀淒涼子賤彈杖藜聽夜鶴世慮苦無端

湖上值雪

農事傷下澤官曹限窮年崎嶇盡所歷繾綣何由宣窗
明變松雪室冷延山煙少歲守恬淡未敢輕棄捐

貴州

離思久不愜幽情晚旋添天宜明月獨山與宿雲兼蛩
語通支柱蛛絲映卷簾若無光霽何以破朱炎在

發橫浦之永淳縣

急漿開濶漲孤尊已夕陽水光排峽靜洲勢背城長太
史才無敵將軍義不忘感傷今歲月淹泊媿滄浪

寄劉傳之

故人去南海已渡百花時萬事須重到孤舟何太遲雲
迷帝子渚月過伏波祠幕府文書省來須慰我思

晚至沙塘

風雨病屢涉煙山知幾重平湖番近服大邑艾遺封受
粟常慚吏看花正閔農周原已徧度明旦復何從

二月十一日遣家人還舍奉侍值雨十四日值晴
作

具船聞解纜想像係朝昏到日初收雨沿流定達村初
生南藻好近北堂萱載感飄零意清江是故園澗

古木

誰擘蒼煙破依稀露老龍偶違風雨會遂感雪霜蹤飛
動關元氣沉潛見物宗何階韋偃伎千歲此相逢

贈別韓德卿歸安西因候司蕭成

十年閑隴道文學老貂裘久別重相見相看更自愁早
膺朱紱寵暫為白雲留寄謝蕭夫子巖栖向幾秋

范德機詩卷之五

范德機詩卷之六

臨江 范梈 亨父

律詩五言

送劉脩撰赴湖南提舉任

久淹詞館寄新奉璽書
還白髮臨漳水青雲動楚山
文稱一道重政類百司閑
設有湘南騎因之解別顏

延平西峽

巨浪劈山傾孤舟與浪爭
逆飛天地肅捷出鬼神
驚至險追前載終身願
太平不然忠孝理值此各何情

次韻曾五判官

磊落將軍石周游太史遷
世人寧見爾我輩故超然
瞻

急投豺地神銷過鵠天祗今誰可語壯志必同年

寄宿維揚驛寄懷王儀伯

水墅見明月適隨歸棹圓故人在郡國今夜隔風煙何
日徵河內常時誦潁川經過因念此書信賴流傳

題靖節徵士歸來圖

維公楚杞梓作令晉衣冠得志但恐暮濟時非所難古
今絃韻寡歲月酒杯寬渺渺山中去淡淡畫裡看

題吳生雨吟圖還寄清江皮野

江雨四時昏故人家遠村如何一見面還又兩忘言老
樹經蛟淚空花斷雁魂由來前日畫妙手出吳門
東齋秋雨後花藥俱有生意

田園雖尚遠未肯效淒涼藥就籬成蔓花因徑作行豈
惟延晚趣自足信年芳頗敬鄰人婦驅鷄不過墻

病中

世故只如此予生今若何不憂新食少但喜好詩多野
鶴來濠上山猿落澗阿平時朝夕者經歲不吾過

哀文集賢時奉使南海道卒

瘴海距天閔道踰千萬山空傳靈雨送不見使星還旌
旆青楓暗樓臺白水間郡人唯我最遠客淚潺潺

贈葛推官

五罰從容至羣生阨塞多但無為已甚勿問達如何早
讀于公戒終傳名父歌故人風雨節為我數經過

張別駕山居產玉芝

高秋別駕宅異草吐奇芬為爾掇白雪服之乘紫雲但
恐仙靈物長遮虎豹群待棄人間事先報赤松君

贈別李全

士以才名重君猶梗槩先間關百年道浩蕩九春天不
為歌彈缺還尋與酒錢古來自如此相問澗西田

奉寄高郵李使君

題詩報使君春遠楚江濱剩水蠶量窟低空雁鷺群朱
幡臨野日翠袖遶山雲早晚金鸞召風流許細分

晚興

古寺山重掩平田縣對門鷓鴣藏白晝蟋蟀破黃昏貝

賈多通市諸偷每近村殷勤省風俗慷慨動心魂

澄邁縣有蘇內翰所題通潮閣在海上

候館駐征騎西風獨夜清開門聞葉落倚杖看潮生有
禮齊蠻俗無歌學楚聲淒涼蘇季子行處足高名

將行值暴漲

雨發巒山漲來從五指原逢橋初沒馬到縣已侵門甚
欲乘槎去還思去佩言輕身犯南斗信有北溟鯤

詠荔子

思歸江路永荔子幾時丹祇念違親久何嫌待爾難園
林有專美霜雪莫留寒記得珠厓道長吟立馬看

細雨

細雨沾牆竹輕風發檻桃幕分流水靜樓抗遠山高但
長琴書癖寧知案牘勞趨朝未覺懶興味屬吾曹

和謝梁內舍過訪

承聞招隱處獨占萬山清乍見心如醉多憂眼遽明薦
遺唐四岳道付魯諸生欲理尋幽事唯妨夜鶴鳴

河口

神女大河口逸人陰洞中船鳴谷雨浪門掩荔枝風鶴
鶴行相背烏鷓宿自同為於百年內試問鹿皮翁

晨至西郭池亭見新荷有感時物而作

虛亭結構美驛路帶垣斜山鄉含晚翠池響集春蛙官
荷已偃蓋僧蔬欲架花俛仰賓從役孰與測幽遐

三山對月懷山壽

豫章千里月漸鮮向天高安得山兒慧能知海客勞榕
城咽韻鼓竹館淨香醪何日書帷下清輝映鳳毛

晚上南山觀燒

渡口向寥闌夕暉生翠屏隨風初繞電翳霧忽如星鳥
獸蒸宜遁柴扉照不扃闕都春始過雨洗合重青

庭草

為愛庭中草經春坐不除澄心皆淨域履道即安居海
氣含樓閣年光映簿書昔人傷廢事作吏竟何如

昨游

昨游居士澗春入羽人丘面面山相引年年水自流乾

坤雙蠟屐江海一漁舟知我能來否啼鶯去復留

雲觀雨後對薜老峰

高閣飛雨觀過新涼連海隅竹溪魚板集松寺鶴巢孤
吏隱非兼得登臨適自娛盛名蘇季子猶是老征夫

京下思歸

黃落薊門秋飄飄在遠游不眠聽戍鼓多病憶歸州舟
甘雨從昏過繁星達曙流鄉逢徐孺子萬口薄南州

贈顛叟僧別二首

問子家何在名山越樹春來游萬里道去作五臺賓乞
食寧忘祿行歌若有神曾逢陸脩靜招入社中人
未是真顛者能顛故有餘試留吳郡草一作幕為報揭陽

書帶月辭銅馬投雲聽木魚南歸定何日白象守林廬

送施處士還東溪

東溪子故物歸去一身輕樹晚雛鶯坐沙晴乳鹿行乘
舟不盡興釣罷忽忘名憶我南山下蘼蕪繞舍生

期出東郊不果却率便河閘橋詣張道人菴尋故

舊作

却欲東郊去還尋北渚來江翻垂木動風過雜花迴
道迷朱轂虛空見紫臺世氛渾不奈憶得是蓬萊

閱友人壁間詠有懷舊游

漫說經行處雲邊第二春石林投倦客畫壁躡高人迹
與風鵬轉心兼野鶴親平生許玄度自比白頭新

和李溉之園居雜詠八首

書劍上青霄鄉閩雨雪遙年華侵水竹客思墮山苗會
想商巖綺將從鄭里橋文詞誠小伎祇比俗情饒
豈是幽棲地飛騰亦未量城根分鼠壤池面合魚梁名
久喧即署歌時感女桑畏卿音調苦疇復貴相忘
圓色依簾障天光切戶庭草生連夜雨花落滿池星未
遂翔寥廓真堪托晦冥逢時須紫燕得意拂青萍
亦欲依家耳衡門斗極邊鄉心徵化鶴宦徑貼飛鳶白
日拋書送青山拂檻延風流自無已憶上五湖船
都無京國意滿眼舊生涯壁隱崆峒木檀蒙婀娜花善
鄰垣故闢愛客酒能賒皦皦荒途子音期只爾遐

偶從耕鑿事便有古人風井瀉千畦碧林然獨杏紅世
情何近遠宦秩自卑崇任道流行意雪壇或與同
磊落人間士名成定不虛願陳元有策交薦可無書莫
遣從師苦因將作吏疏吾徒豈念此媿盡馬相如
丹柰花初結朱櫻子半成寢興因物變筋力與年增燕
拂承塵去蜂隨曳杖行玉泉幾千仞好在翠如傾

重過太傅忠憲王園林

一代王章寵于今勝地非野池花自發春日燕爭飛坐
送笙歌密衙迎劍佩稀頗縈游子騎修景澹忘歸

登覺山寺

遠見浮圖頂逡巡及寺門此行如有待何地更無喧山

背斜陽惡泉侵落葉渾沉沉委臺殿多是賜金旛

種瓠

或言種瓠蔓長必剪其標乃實予齋所種因樹
為架蔓緣不已果多虛花欲去之慮傷其凌霄
之意因賦五言為之解嘲云

豈是階庭物支離亦自竒
已殊凡草蔓綴得好花枝帶
雨寧無實凌霄必有為啾啾
群鳥雀從汝亦多時

秋後瓠果成一實輪囷可愛
余嘉其晚成而不群

答賦云

嘉瓠吾所愛孤高更可人不虛
種植意終繫發生神有
葉誠藏用無容豈識真
明年應見汝衆子亦輪囷

六月菊

蕭然故可愛況在五侯家
未到三秋節先開萬點花
風霜寧未熟歲月白云賒
慙媿青松幹昂藏照島沙

戲簡孔太祝

人間最好日祇在菊花前
頗怪來今雨相看語後天
門堦消俗客冠佩切飛仙
願約秋風住長年泛酒船

寄李彥謙

古燕城下路柳下落西枝
每到重來處長憐欲別時
鷗飛平照急鷗集遠煙遲
此去秦州什應須寄我知

寒齋對雨書懷

冬暖久不雪天分雨破顏
依稀才洒戶慘淡欲連天山

垣屋重重密壺樽獨慳焉知魏闕士隱與吏相關

客至

客至冠纓好殊非舊友生晚晴霜太重冬暖日偏明覺
我肌膚弱興言感慨并子雲工賦述切莫論公卿

詠梅和陳城南

我亦吳頭客年年念遠梅孤根元自植冷蕊為誰開因
覩城南詠淡思嶺表來北人盆裏看應不近蒼苔

守歲詠懷次韻

大年在今夕旅爵記前除時序無閑事江山少定居燭
花分坐委漏箭落城踈底復窮廬嘆人生各有初

送貢仲實還江西

送行何太頻日日見行人又復風霜節相違旅病身浮
名非甚急遠意獨難信念子閑勞苦題詩莫待春

題友人山居

遊居展靜好畫日有高情竹下流泉過花間時鳥鳴因
人問藥裏要我罷琴迎本自無知者山林頗近名

林尊師招不果就別

甚欲樞衣去仍煩折簡呼竟孤林下約還想市間壺野
飯侵濃樹春波亂嫩蕪看雲解榻意秋露近玄都

野望

思遠卑棲地憑高獨望辰峽雲低度晚野水淨含春語
鶴閑梁迴歸鴻歲月新不堪回首處橫笛倍傷神

游招提

勝地相從日應無俗客蹤
春花濃夾騎畫樹靜藏鐘
妙理端深得佳遊亦漫逢
憐渠絲與竹舫上見西峰

送白湛作尉金溪

離思已無極尊前況夕曛
閉門六月雨行李萬重雲
遠祿年雖壯名家代不群
縣人迎主簿應似大浮君

盧師東谷懷城中諸友

契濶遽如許淹留空復情
天遙一鶴上山合百蟲鳴
異俗嗟何適冥棲得此生
平居二三子今夜隔重城

送鄧慶長衍從宦吳中

聞說吳中郡青山萬疊開
雲霞通井邑水木映樓臺
子

去嗟何恨吾生念却迴
辛勤官下養書記合頻來

正月三日海子汎舟

曉日明如茜春波凝不流
浴是浮斷梗過雁折危樓
頗敬吳兒狎何傷楚客囚
沙邊紫小楫初慰玉京遊

送雲知事赴餘杭

一舸發春瀨娟娟沙鷺明
鳴一作官煩南郡佐禮重北城
迎海浦潮聲暗山城日氣清
宗卿懷故掾蚤晚薦高名

暑夕

煩暑不能寐望鄉憶宵征
開門海月白高枕林風清
不飲畏投轄將歌思濯纓
誰家橫短笛吹盡楚閩情

七夕詞

天上新秋節人間巧夕祠不成兒女笑空負歲時悲壁
月堂軒隨銀河帶闕垂低頭媿烏鵲寧為繞南枝

和巽初得子

喜事平安使家書遠見貽正愁行路子新得稱家兒白
壁無勞羨青雲日與期庭堦人事意眼冷念含飴

離席合賦贈南劍教授盛復之之官十首

盛君江海士直氣軋霄崢翻為詩書苦焉知印綬榮度
遼曾萬里走越更千城便是來難得鄉關近慰情

首路向朱夏出關猶到官麥收風漲暑梅熟雨留寒氣
候隨方異才名自古難豈容賢若爾教授老江干
江浦見黃鸝石榴花滿枝欲攀猶屢惜已去復何疑蚤

畏紅英亂還當絳帳移驛程動易隔留待寄相思

娟娟沙尾鶴毛羽映江鮮去住長如此飛鳴豈偶然仙

家應汗漫侯判莫留連憶得東門事須君正壯年

閩南荔子熟問客倘能來暫為諸生屈寧傷獨茂才行

雲飛絕塞落日過平臺賦就新詩別扁舟且莫催

昔向遼東郡長歌覓管寧此行無贈策故事有談經豆

實登朱荔江光照紫萍龜山文物在未用嘆凋零

躍馬問入郭解龜聽報衙江沙侵細竹墻蔓覆踈花政

事離書閣吟情上釣槎有懷當皓月玉署聽啼鴉

碧草津頭郡雖偏是勝遊野人頻識劍稚子亦能舟稍

定傳衣怪聊資官秩周南來記風物有待細詢求

杯酒莫停手路長思八閩精靈淡狎客瘴霧薄侵入海
近漁船集山空鳥道鄰來京書一束賴爾老隨身
黃帽催晨發郵籤報旅程朔風斜帽舉虛日亂弦鳴異
俗從誰變真才不自成倘於高第內歲久得歐生

奉寄淮東憲孔知事二首

日有烏臺使因君問合肥熊章官下食虎畧幕中威易
政聽時變一作報交溪念日違知音偕上列須假繡為衣

又

昔在東門別相離數歲星一官何委折萬里獨飄零楚
樹春頻落燕雲晚自停幾時淮浦月仍與共揚舲

遣懷

柳影侵門暗桃枝亞竹高年溪詩並進春在酒爭豪吏
隱嗟何擇行藏信所遭斯文如未喪端合付吾曹

范德機詩卷之六

范德機詩卷之七

臨江 范梈

亨父

律詩七言

大明殿退朝

曉星寥落動晴霄
雙闕香煙近眼飄
警蹕西來天影近
衣冠北上海光遙
問因正色知春漏
忽報簫聲押畫朝
忝後詞人雖寡陋
極知聖主體軒堯

清讌奉教

日上高城煙霧多
玉簫前路散鳴珂
開筵迥出清川上
對酒其如綠樹何
南極有星朝玉闕
中天佳氣掖鑾坡
長年不負經綸寄
願及昌時養太和

正月節日上寶曆寺行禮退述事

朝參不見承明廬夢想三更尚是初
宿宿重山遮列炬泠泠流水逐行車
柴關響接群僧磬草澤心馳上帝居
聖壽延長天廣大回應涵養及樵漁

晚經皮使君江居不見賦簡

使君直節更無雙又拜濃恩出海邦
絕域朱幡兼皂蓋名園碧樹倚清江
山明殘雪當松塢岸斷斜暉射石砭
魏殺會稽王子敬過門未遂此心降

憶得去年尋藥圃甚憐此日負花時
拏舟况說看燈及叩閣應煩把酒思
浩浩古今奚我獨悠悠江海足吾師
西墻倘遂殘年願來往風流或可期

松湖渡亭子夕眺懷西山朱鍊師

不解無愁祇遣愁憑高試看水東流
一天鷺影摩仙闕兩岸蟬聲送客舟
肯信先生居錦里不將夫子敬一作住

丹丘如聞舊按蓬萊節松下時時省釣游

題阮茂才詩卷

炳炳人間阮嗣宗能詩化動每愁懷
九霄麗日聞鳴鳳六月深淵起臥龍
前輩文章工祖述後生師友係遭逢
一編欲反明珠寄寶匣看君不敢封

贈熊處士還山房

廬山中有山房宋李尚書公擇藏書處
今廢矣海昏李氏為其先作書堂於建昌州
亦曰山房

并記尚書馬蓋有慕廬山者矣聞熊修業是間
故作此記寄之

尚書舊隱在匡廬亂後傳聞宅已墟祠宇祇今誰薦菊
鬼神猶自護遺書石泉宛宛輸池細川樹茫茫映日踈
不識海昏熊處士冥棲消息何如近

贈傅與礪北游

十年身不到瀛洲江上逢君又素秋行李祇今何處在
看花須及俊年遊滄波遠去浮三島白日高懸照九州
大旱若將敷說命賢良記取舊弓裘

贈熊文學

江東閎閎冠群倫多士如君復幾人庠序絃歌時雨潤

廟堂俎豆德風淳嘗因矯舉思鴻鵠何幸升平覩鳳麟
黃葉薊門寒色蚤佇看天上紫泥新

送馬掾遷湖南

聞君暫與故交違去逐西風落葉飛看劍未成今日會
拏舟定復幾時歸雲開帝子黃陵廟月過將軍赤壁磯
事業還須各努力收名即用繡為衣

八月二十日晚試院得雨次時作

彤庭下詔簡賢良大府新開藝戰場一道風雷嚴號令
九霄星斗煥文章求材正合隆天爵發策應當急歲荒
昨夜雨聲傳數點爭燒銀燭待新涼

贈李宣使

故園雲臥四三年府署依然念子賢莫為馳驅傷遠道
但將忠孝感皇天湖南政譽聞爭薦日下絲綸佇近傳
為報津頭黃菊蕊明當照我上江船

四月十六日詣東華門奉迎香輿

天香曉報出宮城已辨隅頭合樂迎黃鳥低斜衝隊過
紫騮踈蕩著班行百王盛祀無遺典萬乘深居有至情
失喜快一作共傳湯沐賜禮官識姓未知名

禮成還齋宮

九重雅有舜儀刑猶遣精神接杳冥朱戶瞻星扶帝座
清天分月下齊庭周旋宛若羨墻見薦裸徒聞黍稷馨
歸舍何人發新詠却兼鳴珮兩邊聽

至夏庄懷平坡舊遊

平坡谷前桃花花年時著屐到君家祇今可買惟村酒
無復能來試石茶簾幙高高通紫燕溪流款款伏青蛇
同遊昨有虞公子却為盧郎得浪誇

贈王主事如上都

天官幕府盛諸卿又從皇興赴上京解后同為遠道客
比鄰猶有故鄉情秋風響近彈琴峽夜月懸當北斗城
須記今年上馬日麟蒲杯裡試長生

長春瓢奉同楊夏二編修為九宮道人作

妙絕新亭九宮下似盃非杓異山壘昔從樹杪凌風去
今向天邊灑雨來芥子量應容宇宙黍銖境不外樓臺

從師斟酌行藏事小閱冥靈一萬迴

送梁知事之婺州

皓月青雲若箇邊送行恨不共吳船
新官浙下皆名郡舊宅山東有賜田
禮樂固應張盛代簿書勿用嘆流年
經時不見曹員外今日因君重惘然

追和盧修撰張平章園亭觀花飲

白藕花邊香已秋西郊風物野亭幽
未須頭短杖扶持病且遣孤尊斷送愁
紫氣近連飛鳳闕青山遙隔釣魚舟
勝遊縱在招要外猶解因詩頌醉侯

秋日集詠奉和潘李二使君浦編修諸公十韻

古薊城邊白露零秋聲不任旅人聽
差差乳燕朝辭舍

嘒嘒高鴻暮過庭以病酬閑翻自惡
將愁抵醉祇難醒何人解擬匡廬賦
千仞岡頭瀑瀉瓴將身跳出市間壺
美賈由來不用沽大地騎鵬須共化
中宵上鵲倩誰扶庶幾未老投簪去
尚可長生折簡呼此輩終非塵土物
明朝種橘學諸蘇

生也無涯死有涯拋書幾擬問南華
要知立志非多事但使成言自一家
寒樹接天霜映鶻濕蕪滿地雨生蛙
相過倘遂攜樽酒檢按墻東野菊花

迴無江左管夷吾誰復能稱晉宋書
運本閑天聊爾耳力能蓋世復奚歟
百年草草雲龍地四海悠悠法象廬
曾向鍾山酌芳草至今心死及菑畬

流落移家白帝城都低頭愧盡馬相如題橋一字終何
益一作賣賦千金竟或無風月長留前輩詠塵沙滿載
古人書此身汎寄空江上已異當時舊髣髴

浮世有田虛寸尺明時無伎畧涓埃偶隨青瑣須高步
欲綴丹書甚寡才斷壁雲過溪笛過逝虛林映雨寺鐘
來幾年間却持螯手強為清秋送酒杯

潘公墻角樹連庭曾是笙簧晝夜聽門巷祇今埋糞壤
輪蹄自昔走雷霆長因午睡思茶竈却為朝吟款竹局
若續濟南名士錄莫令憔悴鵲湖亭

李侯高朗若空晴議論詩書滿腹撐期接仙舟應少便
偶分宮硯亦多情蠻荒異俗中年歷河漢頻秋向夕傾
此去暫煩南郡守旗旄勿用野人驚

浦君高價本璠璣多幸蒹葭得所於學道初輕千里驥
收功直到九州魚詩探飯顆尤難測賦擬蘭陵定不虛
日月西垣更夜值還應共我惜居諸

秋入江山錦繡開白雲紅葉盡詩材句成底用三年得
槎在應須八月回自是每為浮客累非關不受故人催
憑將寄語詞林老風雨重陽又近來

送白无咎太守之郡

瀟灑中書舊省郎排雲曾攬舜衣裳一麾況復守名郡
萬事不如歸故鄉馬首漸違燕闕雨雁聲欲度晉城霜
漢廷擇相皆良吏蚤奉潘輿謁建章

奉同陳應奉訪友人不遇

翰林小暇出西城京國餘秋晚更明鷗度折磯心已熟
馬逢危石眼偏生疾風稍定樓臺色微照猶含鼓角聲
會合何因得惆悵潛夫祇媿未潛名

夜坐有懷舍弟在江右別來凡閱九冬至矣

天邊此夜逢冬至江表頻年望客還謬戴詞林深雨露
却憐棣萼遠河山周流本已違長策趨走那堪益厚顏
何日求田歸計定一尊松下詠間關

寄別倪大同

知君久住玉真壇日與飛仙弄紫環從此便令行地縮
逢誰不說上天難鶴邊紅日浮觴送馬首青山抱檝看

相好何因不相別寄詩應到暮雲端

將赴雷陽送羅提舉之任廣東

松滋暫泊薊門船復指番陽一作路幾千茉莉香淡和

酒露枕柳葉暗煮監煙齊人舊莫無遺策漢史新藏有

剩錢莫為遐荒心力怠珠一作崖更在海南邊

休日出郊三首

上方鐘鼓晝依稀出定諸僧縮法衣迎客猶能下殿走
訪人更有待尋歸禿鷲近水行仍啜危燕當梁乳更飛
自古旅懷煩尉藉並遊萬事莫相違

丞相祠西柳子園新開湖館見遙村風含碎羽珊瑚過
浪湧長干剌剌翻止息幸然無鶴爵去來應或有鵬鷖

江邊柳樹晴相合倚祗為行人作斷魂
歇馬高林煙霧開感今懷古獨登臺遷臣逐客皆前輩
幕長即官盡上才放浪已聞窮九域飛騰終合近三台
謝公自有青雲屐且與從容步紫苔

寄友人

繡衣行部直南州幕府英名蚤歲收如此一臺兼二妙
令人萬里破千愁枕柳葉暗潮聲暮荔薜花懸岳影秋
此去三湘寧久住近天須應璽書來

題燕山僉事綉堂

海康城下白雲飛南部觀風使者歸督部一作郡須持直
指斧歷階尚挂老萊衣高堂見月思丹徼遠路逢春憶

翠微賴有勝流詞翰在定隨華榜照林扉

贈余使君致仕還江東

九華山下女蘿叢使者旌旗發粵中昔至本膺丹詔重
今歸唯頌白頭公百年自喜行藏定千里何當語笑同
門口侍船應有待大江西即大江東

焚樓鎮志曰漢大將軍焚船處也今為文昌縣懷

古奉簡邑文學

龍節迢迢去不歸漢家將軍建國威當時曾見樓櫓集
異代空聞塵土飛風壓春潮吞亂嶼岸分古木轉斜暉
旁人猶解祠神女何故功臣廟貌稀

立春日

今辰春節喜新晴況是山堂此日成畦菜撥餘傳葉美
徑桃留在著花明雲開葛井蛟龍動雲盡蕭岩鶴鶴鳴
失喜浪傳京邑信未聞鄰舍識高情

寄題何處士竹閣

吳漢仙翁丹井西君家高閣俯清溪泠泠脩竹鶯時到
井井空煙鶴晝啼解帶欲圍蒼雪遠敲門待看綠陰齊
何當試荅登臨願繫馬宅前楊柳堤

屈原廟前觀雨雨止渡口觀魚

乍來倏去峰前雨半落未開沙際花春遠客懷淹燕雀
年荒民命假魚蝦徒聞黃霸能為郡豈識張騫若泛查
早謂仙人無世慮山溪往往飯胡麻

送毛鍊師奉祠禮成還京

仙官持節下青冥海瀆嚴祠衛百靈行為治平循禹服
禮從裡祀想虞廷東風到處隨神雨南極歸來奏壽星
致福要當宣室問鶴書先報白雲局

鼇潭慘

征夫魚貫涉秋澹樹底照見石磷磷攀緣惟有千古意
搖落獨如三月春天清過澗猿飲子日晏噪林鷄警人
七曲權歌誰按得他年重問慘頭津

題黃隱君秋江釣月圖

舊識先生隱者流偶因圖畫想滄洲斷雲滿路碧窓晚
明月何年青嶂秋世故風塵雙短屐生涯天地一扁舟

何由白石空磯畔
招得人間萬戶侯

寄上甘肅吳右丞三首

要使唐虞化遠覃
玉門關下屈征驂
多憂總為民心苦
有喜惟聞郡姓甘
日晚邊沙寒浼浼
天晴隴樹碧氤氳
國風不繫秦州外
自此西人識名南

歷數先朝輔弼賢
如公孰可語同年
二童一馬臨荒鎮
百感千憂倚上天
深厚已聞鸞詔趣
平安不用雁書傳
別來濯濯春城柳
誰信秋風慰目前

塞上孤鷹白雪毛
塞門風物靜蕭騷
黃河西去從天下
秦華東來拔地高
枸杞莫將如意以
醍醐足飲勝蒲萄
遙瞻圭袞還朝日
正屬江湖心緒勞

郭茂才要飲舍下
忽報董中丞靈樞
自上都至出城
迎之遂負此約
戲題奉謝

相期把酒對秋暉
忽報中丞旅櫬歸
遂逐城東朝騎發
遙憐江口夕鴻飛
陶潛宅隱波吞石
謝傅山寒雨打扉
人事雖殊風物在
笑談豈可眼中稀

九月十九日京東門與董右軍諸公別至通州還

寄在京朋游

臨分強顏作咲言
上馬慟哭投煙村
十年總仗舊交力
萬里獨懷明主恩
南極下頭星象少
東風近便處一作柳
梅鯨時人祇怪丹砂令
一作曾以虛名細討論

山齋二首

山齋朝雨竹光勻
茶竈催添石火新
對語黃鸝真不俗
飛來白鷺淨無塵
鄰辭榮豈敢要時譽
賞靜猶應媿古人
報道林河春漲起
少須重理舊絲綸
幽棲自是少經過
藥裏書囊奈癖何
仙井朝來雲氣重
洞房夜盡雨聲多
江湖耆舊深思憶
臺館風威尚琢磨
自爾索居增固陋
負苓誰問首山阿

送陳從事歸江東二首

長年京下送人歸
初及扁舟指翠微
豈意遂聞鴻鵠操
却須同製芰荷衣
清江碧樹重重見
紫燕黃鸝處處飛
如此交游二三輩
何因中歲每相違
吳儂呼劍每通神
鑄作由來極苦辛
天下縱無增價士

夜中須有識光人
即今況躡青雲地
何日重翻紫陌塵
令弟兩堦街清顯
甚定應攜手接星辰
傳之經歷謁告還
湘中未語別而宵
征翌日與僚

友追送生居亭中

美人歸思落滄波
昨者論心肯重過
寒盡極知春意在
夜淚無奈月明何
海隅雖暫違霜幕
天上應須接玉珂
如此才賢移病去
瘴煙端的為誰多
北風盡日破南溟
行客經年倚壽星
子有全家依翠岳
我猶萬里隔青冥
山田鹿下投書去
水館猿啼却坐聽
王事馳驅知有素
何由重見此郵亭

十月九日詣天光門上進三朝實錄

儀鸞簇仗滿雲端玉鑰初開衆樂攢三后龍光周典冊
群臣鵠立漢衣冠爐香著日浮晴靄宮樹班霜試曉寒
千騎前頭都不避一作祇傳學士拜金鑾

畫馬

一自房星下渥洼龍媒多在玉皇家赤毛灑血微生汗
黑暈團雲整作花不待老能知失道固應來是涉流沙
如今豈少真神駿猶有丹青紙上誇

石氏壽母

鶴髮西風尚健身綵衣天上四麒麟爾門皆可二千石
此母何妨五百春露下齊山紅樹曉雨生灤浦綠波勻
勝筵偶覩諸賢詠盡敬東川一作學士醇

歸來

十載歸來問草堂入門喜見葛山蒼慈親已慰占烏鵲
穉子行堪詠鳳凰新理園池幾初物小移松栢且分行
卜居未是居難卜為恐旁人議一作楚狂

和柳提學贈危太樸

伐木丁丁秋滿山詩筒忽到與開顏當時有客諳花洞
此地經年上竹關絕域尚懷身倚劍深居曾夢手持環
文章政類龍多變識察能通豹幾斑

題新喻吳氏浩然堂遺事

釣磯西畔問宜州回首空山又數秋曾見龍蛇飛敗壁
每疑魚鳥逐扁舟風雲一變衣冠異城郭重來水石幽

傳得眉山遺記在吳家子弟最風流

過隣人園林

隱者園林畫不譁冠山樓閣護青霞平安日上琅玕竹
富貴春回錦繡花高鳥時排朱檻過遠溪正帶白雲斜
江城只解聽絲管何處能來玉女車

金鳳

金鳳階前只漫生移裁行列甚方平新來兩本當軒出
各吐幽花焰眼明夏雨要將蘇衆槁朝陽端已瑞先鳴
勿云小草精神短每論韶簫記爾名

贈楊茂才

西峽淅淅風雨生南塘蕭蕭樓觀清玄蟬抱樹一時息

一作老鶴懷山終夜鳴放形海嶽等雲水託好音書猶
弟兄未知此別會何日為子商歌無限情

贈王文學

法樂洞天曾一遊君家聞在水西頭石潭密映藤蘿月
山葉深藏虎豹秋豈意吳城祠下路共尋楊子岸邊舟
胸中富有天官學莫為東南久滯留

到京之七日親祀禮成聞喜有作簡曹奉常

南征被命過柴荆瘴土歸來濕病嬰行撥煙霞歸上界
臥聽風雪打長更侍祠想動鳴珂密出次知先警鼓清
拂曉齋宮聞好語誰人不賀一作泰階平

辛酉歲元日

西山千仞鬱崔嵬山下樓臺紫翠開玉帛會同來萬國
璣衡懸運屬三台嘗聞海客談金鼎更見祠官進玉盃
慚媿詞臣今白首久無賦頌獻蓬萊

次韻送人之五羊

豫章遠接五羊城白鳥飛邊道路明昔我乘槎游汗漫
今君攬轡度崢嶸湖堞夕下潮聲轉斗角寒深寶氣橫
總為觀風揚職業有詩才不負茲行

七月一日度毛竹山

毛竹山高風物幽夜宿白雲新雨收沿溪而上鐘鼓導
自昔以來仙聖游久知地迴飛猿黠新喜天空鳴鳥稠
折險縈危盡吾力此行聊不負司秋

和荅張伯雨

靈均逝矣不堪呼幾欲南遊訊楚巫城郭煙濤垂白帝
星河風露浥黃姑幽人昔恨九關豹佳士今猶千里駒
久客資君相慰藉可能無意謝飛鳧

范德機詩卷之七

范德機詩卷之八

臨江 范梈 亨父

律詩七言

曾教授赴韶州

荔子紅邊五月初廣文去住定何如報恩豈戀將軍馬
治盜聊迂太守車多近藤蘿安吏舍少憑椒葛附音書
到官定有佳聲薦瘴雨蠻煙細祓除

獲鹿西郊在樵舍下十里鹿脫穿走山麓余驅騎
者路之以縛自隨時藩兵方燎原靡得觀者傳訝
獵人大火布江磯準備平章旦出圍鹿齊看赤手縛
獲鷲鷹猶傍碧雲飛呦呦尚想山居縱麋麋寧忘野食

肥天上神仙不得力心安束縛從吾歸

靖海縣

海縣春深沙氣暄居人生事不離村上梯取芥料桑尾
抽椽移舟繫柳根已過清明違帝里不妨紅白遍江園
持杯試與酬風物深媿樊遲學圃言

百丈春日紀懷三首

江墅群芳手自我春前相次劇蒼苔鄰僧昨許山蘭送
社姬新分藥圃來本為聖情思共濟更饒生事得相催
粵王溪畔韶光好誰想經年逝不回
東風久不到新堂生意雖微未卒荒草上葫荻偏挺特
花間蘆葍故高長時來豈盡栽培力物化須知長養方
葵藿有心終莫奪每聞支笏炤滄浪
飛飛燕子守繩樞愛爾由來似鳳雛肯為撩人嗔對坐
向曾去我憶巢孤塗泥湏責經營苦爪嘴無供啄哺娛
春社風光時有再天生品彙各應殊

太璞緘至君靜清詩讀之慰快斯文凋弊之餘安
得見二^錄檠然者敬嘆敬嘆一詩寄謝并簡君瑞要
知於二賢傾倒之至也

元豐宗匠是吾師幽夢江湖每見之在昔才名真蓋代
祇今子弟好能詩六經更待黃麻擬雙劍終因紫氣知
衰疾連秋猶長物扁舟未到謝相思

弔張鍊師

名家接武依丹陛壯歲招魂入翠微雖一作使老聃成
自弔不知丁令竟何歸蛇蟬豈戀尋山蛻鷄犬曾聞挾
日飛獨有皇恩無以報昨傳天語慰松扉

季原李翁

魯國先生九十餘百年消息定何如世情看作東流水
天地留恩下澤車隴西供奉豈無酒河上丈人空有書
見說鄉鄰問何事扣門語及暮鐘初

寄題集賢周司直悠然閣

番陽東山下萬山圍魁閣崢嶸面翠微雲接大荒迴古色
波涵落木動晴暉宦情靜與游魚逝詩思長隨夕鳥飛
久待倚闌成獨酌癡兒了事各須歸

徐聞縣懷京下舊遊

徐一作隨

平生不識張廷尉中歲方逢馬伏波乍見山川皆膽落
稍侵霜露始心和皇恩遠荷優隆至旅況深媿慨惜多
天上故人安好在西風遲暮意如何

泰定二年丙寅歲元日

閩藩傑構入青雲簫鼓聲高萬壑聞甌粵誰存封建業
唐虞真是聖明君蓬萊瑞氣皇居正太液恩波御席分
身遠祇懷歸委珮絲綸閣近最繽紛

自戎府出還珠門晚歸廨舍

光迎署府千花樹秀入河橋萬柳梢春日樓臺圍翠巘
夜晴燈火接青郊升平舊俗今猶在浩蕩流年又過交

董奉接官何處宅相依願與結衡茅

閩山神光寺西屋上觀唐李陽冰篆篆為山僧架

屋掩所壞居始二十二字云

城西有寺忽如林伏地叩霄苔蘚侵古人題字看欲遍
今我杖藜來相尋潛蛟在壑不多見飛鳥過巖時一吟
斫破荒祠山鬼怪祇饒游覽重千金

遊南澗寺寺乃唐節度使王審知所建

閩山東面啓松門梯石層層見梵尊題表尚存唐節鎮
地圖渾似洛林園亭因聚遠開幽徑棧至臨危出小軒
最是躋攀宜健步病身無羽亦飛騫

伏觀中書以內郡饑遍行拯拯新令感激有作

江南往歲旱連州河北今年水逆流恭體朝廷寬大意
少紓田里散離憂表章有道誠長策衣食無功本拙謀
國制由來重農畝太平政不在他求

憲司雙榕輪囷數十圍其茂數畝雨止觀白鷺

榕樹庭中翠欲曛飛來白鷺動如雲每當彈射思傷物
忽到徘徊感離群護子烏鴉來辟易附人鸛鵲漫繽紛
要知得失都何與含育何由報聖君

歸思

陶公歸思定如何山郭春風長薜蘿直道當官惟任拙
庸才負祿祗慚多江山實自辭家隔日月虛隨閉戶過
點點飛鴻向天末憂端不類澤中歌

到官

陶公到官八十日今我到官餘半期勸農省俗了何補
暖衣飽食將何為常思在山溪虎豹幾曾當道假狐狸
英雄見義^尤飢渴可使文人有媿詞

風止聞鶻

荒山遠水放輕舸頓雨顛風戒弊袍五六月餘鄉間絕
二千里外客心勞樹間烏鶻聲頓好天上麒麟格自高
獨有武夷看未了野人寄語壓香醪

奉和吳宗師退朝

柳外朝冠古進賢雲間觀戶舊通仙蓬萊豈隔三千里
華頌宜過一萬年香並袞龍浮瑞日聲隨簫鳳下晴天

文臣不願金莖賜但想黃封到竹邊

奉觀郊廟禮成簡曹禮部元用

西山半壁影鈎陳晴雪新消路馬塵兩歲通行三大禮
千官中稱一閑身伊臯事業何當下管樂才名不用真
遙憶南宮舊詞伯退歌清廟屬生民

和馬貢士元夕同觀燈之作

已戒金吾夜不譁西山又被雪微遮飢年禁釀知誰力
到處看燈似我家旅夢比常經赤甲病身猶欲戀黃芽
雲端此日煙霏暖遙想仙人立露華

答李洞

客居離索感芳晨願耐物色惱詩人花心盡逐陽和動

柳眼宜於故舊新萬里清江家共遠九春皓雪夢兼頻
鹿門自有龐夫子長往煙林秋復春

調馬君

平時有酒不解醉愁至方知酒道尊一萬里程兼雪霰
三千年事隔朝昏何因洗盞花間嶼更與停鞭柳下墩
寄語東鄰馬貢士今辰琴筑好温存

獨立

能詩不得靜中師又是天涯獨立時高閣夕陽人影亂
曲河新水棹聲遲一身慷慨家仍遠十口淒涼歲荐飢
偶爾凭闌感風物臨流先被白鷗知

張留公母

山風遙引紫雲車樓閣春深阿母家更五十周重甲子
後三千歲一桃花綵衣故綰封留印白壁新隨蜀使查
見說麻姑舊行處至今原上有丹砂

奉和王繼學懷濟南舊游四首

前輩風流迤斷澌濟南舊錄故人詩遙知靈運初游日
正是元方後載時青社寥寥成異物丹丘晶晶屬遐思
壯年易動離居感繾綣花前金屈卮
樓上看山翠黛浮樓前沽酒錦纏頭登臨試與詢湖雁
豪傑親曾侶海鷗沙嶺曉晴雲散出野亭春盡水交流
意中故舊那能得強擬偷生賦遠遊
每愁大手不如燕多見公侯勝昔年計拙欲求千戶等

心勞政類十洲仙幾回見月思歸去暫到臨風復惘然
翦盡綠楊三萬樹多應無處著啼鶻

手接新詞絕底清一雙白眼為君青寰區政待新年穀
江漢徒傳赤日萍斷雨潛蛟虛水榭遠波迴鷺實雲汀
此情可在齊州外不解無人問獨醒

和田師孟郎中寒夕食西曹郎事

正是西曹遣翰初落花寒食柳微舒每因作者留心苦
多恨時人守法踈詩思偶閑絲上史刑條正作腹中書
平生萬卷蘇居士皓首東坡雪不如
上真應寺觀寺後龍湫湫在屋上蓋由寺北下馬
並高數十折得之又數步許得巨石有僧龕其中

云即唐盧叟所隱成道處時日斜方焚香誦經聞
客至乃輟誦相迎作茶云

憑高窈窕辨精藍濯佩還思訪古潭字扁孟家題處碣
洞留盧叟去時龕近人野鳥如曾識問客山精不敢談
聞說平坡猶在上登臨雖倦且停驂

雨後坐郝大叅亭子

每見人來問草堂偶從燕坐憶滄浪地形遠競朝霞爽
林氣清分宿雨香移石旋成行藥徑障泉思引釣魚航
他年紫綬歸黃閣几杖苔生儘不妨

雨後過王長史

省郎近佐三公府想得疲懷似故山風急游絲當院靜

雨餘芳艸閉門閒未離塵土長思蛻已近江湖不論還
自爾相看慰岑寥不聞朝署有新班

挽劉提舉

逝川無力可能攀又送先生葬碧山化鶴不歸華表上
鳴鷄尚在白雲間空歌楚水巫山些不見蓬洲使福還
畢竟修文陰有待玉樓何許淚潸潸

和荅陳尚賓應奉雨中雜詠二首

鰲背地形盤楚越雁邊雲路接青徐古人以用三千牘
今我曾無一字書賴有交親分翰墨時因寄贈到堦除
治平最忌聲歌怨且莫逢人問卜居
小白幽花類素馨沾泥帶露映書檠尋常愛慕何由見
旦暮凋零未忍聽不為獨居娛耳目祇緣多病役心形
便當去結浮丘伴早服還丹制朽齡

贈別鄧脩撰歸杭州

東風二月禁門鶯天上佳人有遠行惜路頻瞻霞上日
望家直到海邊城休須滿假辭三徑定約重來賦二京
回首津亭萬家柳初非憔悴獨閑情

雨後寄懷田師孟郎中

山雨不來喧靜夜江雲猶自護清朝一羣青雀園花老
幾箇黃花嶺樹遙何有深心期管樂獨無高步接松喬
未能逕去成飄忽且可相從慰寂寥

謝冷架閣春日東麓見懷

空谷白駒消息遲東風楊柳萬煙絲珮環憶為同心贈
書榜傳看俊手施曾以陋居追往昔却因嘉遯感今茲
相思恐涉山靈怪不遇仙人不記詩

送別周儀之推官赴錢塘并簡李四秘書

武帝龍飛第一春京華相送各沾巾詎知邂逅文身地
總是栖遲皓首人山驛蚊眠星滿洞水鄉雁起月迷津
若逢李洞南天竺為說前詩感嘆謝頻

送李秘書洞

秘書出自蓬萊苑流落東吳又一春見月定懷騎鶴侶
聞秋肯讓鱸鱸人吾曹事業徒溫飽子等居諸異隱淪
海表何由攜手再相憐同是老詞人臣

五月二十九日口號

金門清午亂鶯啼市柳宮槐綠影齊雙闕鳳飛天咫尺
千官鵠立路東西欣聞有詔推慈極未省無書慰遠黎
直欲萬方歌聖德功成誰合奉玄圭

寄題龔氏山園

居士名園何處求無有是中風物幽岩花故解分藤綴
澗水新能合竹流綠幙黃簾圍玉樹青天白日映朱樓
醉吟自爾人難識況是心輕萬戶侯

題樓碧山

李白山中荅俗人當時未識宿心親桃花流水鵬南意
茆屋蒼苔鶴上身但有漁樵說幽事斷無車馬惱比鄰

使君自有青冥侶莫道衡門異隱淪

五月二十日發雷州過徐文次驛候役者不至留

二日

久約歸吳弄釣舟海天羈思復悠悠誰知樹底春生月
獨坐人間地盡頭粉壁舊題分蘇讀瓦罌新酒接花籬
邊鴻固是南來絕絕為雷城信滯留

余使君以僕歸自海外惠詩相勸辭氣有激因韻

奉荅

瘴海蒼蒼地盡頭遠煩使節按春秋莫論槁外求三害
且與詩中補四愁見佞常慙神草指憚勞不念聖桴浮
迢迢隔水猶如此何況人間大九州

瓊州人陳伯皋自京下攜趙郭兩學士書來示將

教授南恩以詩別用韻送行

白首乘雲謁太清還家又復海邊行起居試問三山侶
教授須求六館生上國書辭南土重異方花鳥北人驚
暮年要壓春州瘴多種梅護四榮

初擬九日至章貢泛舟而此日止到韶州因懷劉

子儀句漏舊作奉懷

句漏山前題句早鬱孤臺下泛觴遲一從滄海輕為別
再見黃花重所思書畫不嫌花類碧髻毛空嘆色成絲
登高不得賢賓主孤負西風落葉時

出嶺即事奉寄中書元翰林

幾人生出鬼關門我獨從容仗劍還扶病猶能驅瘴癘
投閑應欲選名山炎郊未用辭行役鹵海先當奏庶艱
賦有均輸今再倍相攜賣子盡諸蠻

挽黃徵君

生平不面死何言忍送輶車出薊原已去幸逃中野葬
未招最是北方魂碣辭義許門生識芻祭期當郡士奔
五十年間杜員外曾將旅柩托諸孫

送元經歷赴廣東

番禺直北望長沙元帥持戈鎮海涯萬里送君歸幕府
幾時為我寄梅花雲蒸巨浪魚吹岸柳壓荒山獠陣牙
欲托鄉書妨枉騎湄湘西上是吾家

壽宮

武帝初行祀竈方祠官宮女儼分行石闌井井通金殿
金蓋童童出畫牆但見擾龍呼作相未聞騎鶴拜為郎
祇今松柏緣原廟時接雲輶下大荒

初冬即事

天街昨夜鳴鷄蚤清曉金門拜赦書紅日煖過三丈正
碧雲細作萬行舒懸知幽犴無留繫更約冥鴻有定居
九域祗今重譯去太平不用指南車

贈陳提舉

便令白首縮青銀已負南宮第一人文武既興殷士貢
申轅猶比漢儒真離鴻獨立苦事風霜急伏驥深心道

路親若遇清溪尋舊隱洗觴猶及艾陵春

元旦口號

新春喜氣動坤輿准擬豐年大有書遠貢休煩大宛馬
近郊爭望指南車勤勞孰是仁人敵清淨當知治道餘
但見生民無一事朔南處處樂樵漁

哀李集賢并序

燕人李泰字子亨以善琴至元中常召至玉殿
大賞之卒官直學士無子其女居喪盡道為營
塚壙碑志既數年又因其私親孟遵為序走諸
士大夫之能文者乞詩汲汲表其先德
之死從知萬慮休女郎獨抱故箕裘關心政繫青山塚

遺事寧稽白玉樓殿上袞龍曾映日人間絲鳳不鳴秋
於今過馬廬溝雨宰木蕭蕭敗葉流

奉酬辛編脩高齋詠懷

行止於人道未垂有底誇盡好高齋浪傳久客虛生事
切喜新交足雅懷秋鷹照草神先俊晴翠當風意近諧
高閣夜深生白露莫教螢螢火亂空階

八月十六夜與長安侯孝昌會宿西山亭

月露秋生松栗林高堂駐馬倚脩岑平生萬事曷稱意
三見美人傾盡心歌笑直麾時序感髣毛溪戒雲霜侵
壯年自致涓勛業一去雲山足賞音

韓僉樞宅看臘菊聞梁掾亦有嘉種

僉樞門館靜如山黃菊花開落木間
照日大錢分箇箇背霜新翠簇
斑斑淡知窟宅緘藏密益敬
茅菁捍衛艱見說比鄰梁掾
長衙回清賞閉柴關

送夏蘭谷同知赴會昌州

承聞吉日上江船佐郡分符
落雁邊野館西頭三晉電
山城南下七閩煙庭春花氣
迷銅墨市暝溪聲合管絃
何日周廬尋舊直佇需報政
九重天

奉和陳尚賓應奉雨中雜韻

鰲背地形盤楚城越雁邊雲
路接青冥徐古人以用三千
牘今戎曾無一字書賴有交
親分翰墨時因寄贈到塔除
治平最忌聲歌怨且莫逢人
問卜居

小白幽花類素馨沾泥帶露
映書樞尋嘗愛慕無由見
旦暮凋零未忍聽不為獨居
娛耳目祇緣多病役心形
便當去結浮丘伴蚤服還丹
制朽齡

題黎別駕安南國志

三萬人惟一士竒圖書托始
更堪悲未聞島客從王日
有似天官命子時郡國終須
刺史駕山川先識撫軍旗
何當表上歸瓊館采撫如今
政用知

壽叅政郝公

相公不著惠文冠猶得歸來
學謝安萬寶何如看玉樹
千秋祗可托金丹層冰積雪
開元氣霽月光風映歲寒
欲助蒼生霖雨祝夜瞻南極
倚闌干

和謝十月八日至懷安縣是夕入福州城

山城列嶂駐餘霞水與長空映遠沙
荔枝林外客思家遙遙徐市三神擢
渺渺張騫八月槎
早歲學游今白髮不應猶戀棗如瓜

平臺晚懷

落日微風生晚涼平臺西上萬山蒼
佳人獨不生同世
樂土那知是異方海嶽雲霞千古意
鄉關道路九迴腸
丹青不寫歸田賦徒以虛名累霍光

蓮房

憶得花神一笑歡六郎家住小江干
佳人怨等秋風近
稚子眠聽浦雨寒強為折來開戶牖
誰將鎔出擬盃盤

少年太守思兄弟戢戢青頭莫漫看

桂子

畫輸桂金粟三千斛換得瓊枝數點秋

種

失却從世上異香浮石巖夜見呼猿摘藥臼
晴敲伴兔
收十月天台誰見得西風吹夢落山頭

寄武夷杜伯原甫

徵君家住武夷山白鶴玄猿夜叩關
船泛清冷凡九曲
屋分丹壁只三間世人往往知名姓
仙子時時定品班
孔壁秦灰天未喪幾多魚豕待重刪

雪後和鄭司獄

江皋雪止雨蕭蕭時見殘雲抱樹腰
久媿彈冠隨列從

聊將束帶狎群寮汀州下地宜朱橘瘴霧南天暗綠蕉
回首昔游今屢絕可無詩酒給清朝

范德機詩卷之八

范德機詩卷之九

臨江

范梈

亨父

排律五言

贈別劍南李使君三十韻

北戶群山表南雲九域西君今行欲徧此意別都迷妙
句人誰識前年手自題

李以烏撒宣慰同知改吏侍部
侍郎使交趾有南征詩一律

絕崖鉤象譯懸徑摘烏栖炎隩通冠冕邊陲重璧珪禮
新尊璽節名故籍金閨勞有恩言切歸無寵數躋宸心
端外見廟誼肯中稽望譽騰青瑣輝光拂紫霓泥旌麾
溪假借民社載扶攜猛氣排蒼鶻幽思啓碧鷄動應多
愜會行豈強扳提皂蓋喧童穉黃堂拜耄倪天機馴虎

兕帝力及鳧鷖越厲冬深少閩煙晚向淒野人封水竹
郡吏接山溪汎碧荷香弱坡紅木實齊九秋鵬鷃翮萬
里驢驘蹄導從羅弓矢登臨按鼓聲少湏青玉案與報
白銅鞮忠信先蠻貊文章協壁奎孰云當近服不遂慰
烝黎執手閩河早論交歲月暎物華盈眼亂春色傍人
低謝豹空洲隱王鳩遠樹啼國容方整整衰病轉悽悽
謬忝詞垣密微能官秩卑從班窺遜霸浪漫笑山嵇何
日同樽酒因風獨杖藜延平寶劍氣旦旦候虹霓

寄甄氏訪山亭二十二韻

問子亭何許滹沱舊水頭谷陵千載異風物四時幽城
郭長無事琴尊或此游窗攄平野秀戶接亂泉流猿鳥

相賔送漁樵互獻酬太行晴日近碣石晚煙稠莽莽青
天外離離碧海陬都將神迹化只可笑談求大檻花周
映虛堦藥竟抽豈容黃壤汙祗為白雲留更就諸峰老
寧湏萬戶侯心知嗜好酷勢肯去來休予亦尋山者人
疑避世傳偶然依紫闕不是謝丹丘薄與江湖遠頻嗟
歲月周夢常經五嶽思屢繞三洲室宇憑誰寄園林誓
自收把書消旦暮種藥引春秋地僻澄官冗天空掃旅
愁幾時攜古劍萬里覓扁舟瞻想高人趣空懷賤子羞
猶勝徐市俗瀛島計悠悠

曉山謠贈別金陵陳處士

昔我望天岳于時春已深鷄鳴九州陌鶴警萬花林旭

日騰重海宵霞映別岑露條承蝶嶺雪澗瀉嶽峯馬足
何由定鶯聲不可尋畏鐘牽逸覽拄笏繫虛襟每想丘
中趣如懸空外音十秋傷逝水千壑記捫參晚遇陳夫
子高談契夙心天形疏造化月眼識浮沉宦路思懷玉
君門惜和琴豈因平旦氣薄示暮年歲但恐丹崖失何
愁素髮侵會當期絕巘與爾鍊黃金

贈裴秀才

江邊見立春花老問征人物色隨異鄉風光迓候新朝
廷方貴士經術足謀身舉世皆騰踏如君獨隱淪鳴山
應鶯鶯在野決麒麟已用遺經試寧辭累牘陳飄飄行
李別繾綣酒盃頻四海多英俊諸公自等倫雲霄開大

道溟漲接通津百疇庾倉近雙飛蛺蝶勻款留俱醞藉
歸到莫遠巡肯薄傳家賦猶堪博釣綸

曉山圖

一望成千里長年擾寸心林含宿霧重江並古厓深蒺
港驚漁唱柴扉放客尋石橋臨齒齒煙寺隱沉沉何日
投朱紱其間寫素琴愁時應莫展恐有夜猿吟

贈李提舉之官豫章

公孫閣下士多似魯諸生昨者聞高誼茲行起盛名文
章南斗近征旆北風輕余亦懷鄉郡今猶滯帝城關河
驚半面雲霰念孤征芳宴絲簧咽新詩錦繡成長途心
果怯令節眼增明渺渺飢鷹度嗷嗷旅鶴鳴露凝秋浦

白雲散夕堂清是物閑流動何階計合并會須營桂楫
相共啜蓴羹徐孺亭前水因之幸寄聲

立春日和王翰林

北斗紅雲上西城皓雪邊歲華今若此宦味故依然節
籟荒冬後寒驅夾日先樓臺通帝極井落散人煙登眺
臨無際歡娛信有年客情關外地農事庾陰田只有傷
絃促那能效屨穿幾時歸櫟社盡日接芳筵寶鼎昇平
瑞金旛淡蕩妍透迤朱鳳集瀟灑白鷗眠遠業嗟何就
高明賴必傳道雖沾世用意漫迤時遷顧遇煩頻數欣
榮頗信千江湖萬里興爛熳百花前

寄福建杜廉訪使君

臬府群工表言官百世公君王資稷高臺閣起黃龔吳
越聯閩服蠻夷偃漢風九州諸道右一柱萬流中虎豹
精神肅豺狼道路通青冥行勁銳白日貫精忠斧繡揚
秋隼泉阿達夜蛩壺冰元自潔瘴雨不勞空賤子嗟何
幸微心誓盡躬望來方切切告別匪匆匆祇為文科重
尤慙祖餞隆客魂消海鵠病骨瘦溪蟲謬敢辭王事私
嘗泣老翁髮緣思母白顏每應人紅尚俠彞倫薄其如
祿養豐以茲三徑撫猶獲二天蒙上幕刑雖簡滄洲道
未窮請將心萬疊寫入嶧陽桐

題翰林山水圖

敏絕丹青手驅馳翰墨場力能移地軸藝直破天荒素

壁清風起蒼厓旭日光喬林走混沌巨石偃滄浪霍背
芙蓉隱牛頭薜荔香參差殊不謬奔峭亦非常仙去違
真館人來倚釣航何知萬里近不費一生忙擬乞丹砂
洞長尋碧草鄉松喬如可及結友更何妨

奉觀百官迎香輿出南郊

聖治尊皇極天章達紫微禮宜崇報祀時則重瞻依吉
日初蠲策圓丘肆大祈相君蒼玉珮卿士赤金圍寒館
寒猶澆清鞭晝漸稀合鄉來北闕敷隊出南畿夜雪旣
旣過晨煙漠漠飛難叨惟帝澤獨敬在天威禮樂寧無
述歌聲合有歸從知克德大不外贊巍巍

和謝友人惠范君用筆

毛君好伯仲枉駕及東堂畫縛曾無竿蘇亂周行倍有
光欲飛隨燕上未化學龍藏盛賜懷全璧斯文托一芒
姓名渾偶合潤色奈奚當且效峨眉老題詩西上方陽

次韻朱尊師祠天寶洞

天風散次寥海月隱岵嶠一逕入垂鐵千山含洞簫水
沉蒼玉信爐養紫金苗妙意今誰識竒踪古不消長當
辭組紱共往契煙霄攘攘淮南桂八公應見招

排律七言

禮部侍郎王君桓急流勇退者也隱東原田間二
十年既壽且康因其姪翰林奉簡二十韻

慷慨桂冠神武門從容結會洛陽園朝廷卿從思遺直

鄉里兒童識達尊，款石杖藜煙際寺。行花簫管水邊村，尚書舊履飛仍得。內史新經見莫論，霜雪飄迴凝久操。雲霄空淨慰孤騫，聲名節槩公無等。文采風流子又孫，玉樹枝柯交雨露。冰雪壺表裡照乾坤，誰能與國為元氣。獨肯將心養靜根，八表已開仁者壽。九重方紀歲之元，從初拾草向何處。此處種桃應滿園，源仙境六時蒼雀引。帝城二月早鶯繁，題詩遠托滄江使。知有冥鴻在魯原。

送沈教授南歸

城邊古樹四時青，那得秋陰滿近垆。總為殘蟬嘶并急，不關病馬涕先零。故人聞已扁舟具，此夕還須促拍停。昔在雲眠思上國，今承露檢下明廷。未厭群俊登三事。

且為先王守六經，行色暫疑紛似雨。生徒未敢散如星，江通湖漲春吞海。樹壓山光晝射庭，或者可無賢誚責。總之不外靜儀刑，十年鄭老文稱館。百里陶公粟在瓶，自我雲間聽鶴唳。笑人閣上拾流螢，亦知多病非緣別。但得長愁不願醒，滿眼風雷決江漢。與心日夜赴滄溟。

絕句五言

題張果老騎驢圖

細柳官橋路騎驢，不用鞭先生誠有道。此去亦千年。

題竹樹圖

老樹半垂葉，疎篁斜露根。若無煙霧隔，應見石西村。

秋江

秋生洲渚靜露下蒲荷晚忽憶釣魚時人家楚鄉遠
建昌小湖望廬阜二首

青雲覆疊巘白鳥度平湖釣嶼夜來雨山深知有無
我懷負鍊士多在巖谷陰惟有高林月長知望遠心

題二仙圖

明月萬山空溪橋暗路通不知何洞府終夕坐松風

絕句五首

障擁芙蓉競燈隨擇柳繁移星臨迴野踈雨過高池
江上打魚船有頭那無尾與卿相見時不望如魚水
鄉路西州是延平那向東片帆儂會使祇是怕隨風
水清灘自急蕩槳直湏人勸卿休恨水多為不知津

水如青銅鏡山似綠芙蓉中天明月上此處好相逢
看東亭新筍

問竹何年有親曾共歲寒昨傳新筍發扶杖繞林看
送別

為君垂別淚更向楊花側斗酒問離鴻幾時歸故國

燭夜

燭影夜侵牆松桂成行列鼓絕草蟲鳴四山露華結

秋江圖

雲裡衡陽雁網下武昌魚石門秋共遠江樹雨餘踈

芙蓉

芙蓉生石壁雲錦映青松那憶南州路歸船處處逢

端溪峽

芙蓉生石壁猿鳥路東西維舟逢暮雨戴笠看端溪

東署

習靜天常見居深路僅通陰階垂葉露空院長花風

絕句

日淨芙蓉遠春明薺菜長誰憐玉蝴蝶正似錦鴛鴦

晉賢驛亭畫竹

道路黃塵裡蕭然見此君遙知不是畫為有氣干雲

東城夜讀聞雁

如何歸未得庭樹又飄零夜半鳴涇雁開門倚杖聽

絕句七言

懷小栢

手種庭前小栢樹分枝散葉總天成涉旬不見長相憶

況是經年別友生

楓林雨止

籬角楓林露鵲巢春深翠葉未全交山家老屋渾相似

千里行人識把茅

題黎氏家山圖

漠漠家山在白雲石橋流水路斜分狀元坊裡重來日

還有新阡表陸君

社日

丘隣雨止散青煙白叟相違已隔年忽遣大兒三角結

打門來覓社神錢

贈卓秀才還澧州

不說從師學道難
一身千里暮雲端
是行若拜庭闈罷
有使題詩祇寄蘭

五月二十六夜宿松林蘭若

白沙塞下接飛霞
行至招提日已斜
睡覺忽聞山鳥語
不知今日離吾家

瑞州城東水邊松下遇老翁稚子蕭然有桃花源

想

花塙竹柵護長松
雲去柴門晝啟封
不是武陵州縣古
秦人那得晉人逢

登高風亭

亭在三劉祠後今西澗書院劉徽之書高安人子道原孫義仲

罷官本自亦由君
直節高風世世聞
天下布衣能致祿
多應無傳附青雲

桑落洲

桑落洲前秋興孤
白雲遠見近還無
傳聞酒吏經年罷
美釀家家得縱沽

發湖口

已過匡廬却向西
片帆猶逐暮雲迷
路長正是思親節
取次驚猿莫浪啼

潯陽

露下天高灘月明
行人西指武昌城
扁舟未到心先到

臥聽潯陽譙鼓聲

題山水圖

煙厓窅窅樹欒欒
三兩漁舟戲碧瀾
不解買山頭已白
今朝又得畫圖看

十月白牡丹
郢中孫氏家植也

霜檻枝頭結素雲
分明便有繡成裯
紫皇為愛春風早
特向瑤臺折贈君

八駿圖

天上房星照九垓
翩翩西域畫龍媒
崑侖一去無消息
空見人間八駿來

試院中戲題姚檢校山水圖

故園不涉已經秋
何日徑辭黃雀樓
却借仙人綠拄杖
乘風散上碧峰頭

以瓊扇一握奉致黃明府

拾得炎州月一團
殷勤持贈比琅玕
情知已是秋風後
留作明年九夏寒

詠鹿

可蓄終然不稱家
呦呦如怨復如嗟
何如送汝歸山去
許令臺前臥落花

鍾陵夜宿聞鐘

中年江海夢靈皇
夜半聞鐘似上陽
一百八聲猶未已
更兼雲外雁啼霜

宿村莊見高進士留題戲作

三水橋邊望翠華
篁行人駐馬
立昏黃
因何秉燭來投
宿州判題詩在草堂

午憩村落竹溪上

竹連流水水緣村
上有青山蔭
亭園此處不容居士住
短墻午暑特侵門

日晏

昨日相期早出村
今朝日晏未開門
可人一夜東風雨
綠遍天街舊草痕

四月三日早作訪夏編脩

曉穿甲仗抵晴沙
橋角垂楊亂映花
春色於人元不薄

將詩句引到君家

答贈晚春

懶向佳人說翠微
長安陌上見春暉
誰家門巷花狼籍
吹作漫天白雪飛

初六日在院中僚友無人至

乘輿聞喜達皇都
自此玉堂宣鎖無
閒殺幕中揮翰手
日長獨坐數花鬚

因杜右父編脩贈痔醫

舐痔曾聞獲乘車
玉卿妙藝復何如
祇應杜老波瀾筆
絕似齊人治驗書

院中夜直

此身只似到南州
莎草寒鷄一片秋
後夜玉堂誰上直
料應少睡更多愁

贈黃道士別

二十四巖煙霧幽
輕舟橫笛戲清流
萬人舉手風塵下
怪殺仙人學遠遊

鄰燈

星星遠映孤村外
炯炯微穿落木間
知有鄰姬思遠道
績麻應待夜深還

休日

暫解晨參不出關
有時持酒憶南山
無端却被詩牽引
斷送先生此日間

十一月十六夜

本是圓時半不明
非緣掩見復何情
更無雲表真消息
鐘鼓盆罌亂自鳴

戲題二牛

燕山丈人年九十
戲筆掃此雙犁牛
江南夜半春雨作
老農驚起為君愁

離揚州

孤蓬如磨遠汀沙
葉滿平湖藕未花
回首竹西亭漸遠
一江煙雨酒旗斜

贈裴氏二子

唐晉公之後
家有胡銓盛德堂
銘其先世因守

是郡家焉至今尚為儒流

有後淡知晉國賢傷心不為海南邊相逢莫笑無多贈
猶是詞垣舊俸錢

過三合驛

一春歸計又蹉跎窮粵風光奈病何總有青山千萬疊
行人長少鷓鴣多

江閣雨望圖

高閣秋風樹半枯連山更帶雨模糊幽人把釣空江上
縱有扁舟不受呼

見觀西人家石榴

石榴始華實已紅橘柚照日青玲瓏自來南州感風物

賴得鄰人生意同

十月十一夜東署聞雁

久別雲林舊草堂亭南江都邑歲凋零可憐此夜長空
雁正在青松樹底聽

詰朝進書西宮問盧九修撰借馬戲奉絕句

作書太史具有喜徒步拾遺方可憂明日待朝天上去
何由贈我紫驂騮

高齋

俗客過門應有數祗言渾似野人家小齋高接萬林杪
坐見城南城北花

候孔校書

承聞舟楫止河干久別深思再見難已具一尊林下酌
好來共慰百花寒

悼節

百花高下擁晴天竹屋方林興悄然忽憶逝水人泉下
冷學燒楮火作新煙

清明後聞鄰莊牡丹盡發館中獨遲雨晴忽開一枝詠以志賞

千山颼颼雨兼風憔悴群芳二月中整待人家春事過
小亭特放狀元紅

題楊補之墨梅

學到逃禪自一家洗空塵墨印江沙筆端不有蘭亭骨

莫寫園林雪後花

江東晚泊

雲間列岫映朱樓江水東來打石頭不是行人惜光景
人心舊有帝王州

江上古祠

老樹昂藏倚岸隈祠靈經歲鎖蒼苔豚蹄卮酒能多少
便有群鴉旦暮來

便一作但

重感

曾謁聊城太守歸吏扶殘醉踏斜暉重來柳下停船處
太息人間萬事非

湖面

湖面春深暖氣勻青蕪未隕一作已知春沙灣散駐張
魚客葦室時驚射雁人

玉隆宮

東晉真人尚典刑石函故在藥飄零閣前正是升仙處
雲路笙歌少得聽

經梅仙壇下

懶慢辭朝梅子真空山祠廟已千春自從上疏東都後
不見一作江湖有直臣

北山谷中老父

無多林屋冠青山長子成孫鬢未斑問我鄉原何處是半
生江海未知還

題萬竹秋聲

山人愛竹手自種萬箇直臨江水邊長吟浪被秋風覺
散作宮商聲滿天

錢生幽禽圖

誰人翦下碧梧枝悞落西風粉墨池立斷小池禽飛不
去朝陽何事鳳鳴遲

封州作

魏闕迢迢隔綵霞別來幾歲客天涯春風二月崖州道
時見棠梨一樹花

渡端州峽

櫂郎得便泝清流忽報舟前曉霧收蠻語酬人翻自苦

好山不敢問何州

正月二十四日至寶圭驛是北流縣自此遵陸指鬱林矣

遠辭京闕白雲端
沂盡夷江未到官
回雁峰南更千里
是行誰為報平安

登沓磊驛樓自此渡海

半生長以客為家
罷直初乘瀚海查
始信人間行不盡
天涯更復有天涯

謁海神廟

南州未識異一作嶺
嶺一作嶺初向沙頭問
人水神料得行藏
無用卜乘桴人是
北來人

得樟樹鎮便寄家書

商船夜說指江西
欲託音書未忍題
收拾鄉心都在紙
兩聲杜宇傍人啼

瓊州出郭

自出瓊州古郭門
更無平行似中原
重重葉暗枕柳雨
知是黎人第幾村

臨高阻雨

恐傾南海成秋雨
急喚西風作晚涼
淨掃黎山須見骨
莫令楚客屢回腸

檳榔寨

秋入黎山風雨多
長江不定駐驚波
翠榕葉底聞鸚鵡

自此無如客思何

定安縣

島上晴雲滅復生
誰家吹笛海天明
縣堂曉起西風急
半是淩黎夜雨聲

至富屯

承恩千里出江鄉
轉歷三關道路長
黃葉霧開山市集
見人鳧雁憶橫塘

西樓

童子出春親掩閤
春來芳樹伴人閑
別家五月不得信
獨上西樓思遠山

遊南臺閩粵王廟

海角釣龍人杳杳
雲間待雁路迢迢
若為借得山頭石
每到高秋坐看潮

元夕

危樓向暮倚晴空層
故歲今年不得同
記取合沙元夕節
滿街簫鼓雨兼風

正月十六夜雙門觀燈時閩粵閩官吏皆集

雙門此夜啓崇臺
次第東山好月來
自古金吾元不禁
少留大將與銜杯

二月十六夜得舍弟書及知熊敬輿茂才消息期旦夕有會良惻快也

故人天闕騰新薦
舍弟雲溪守敝廬
未省東歸何日見

挑燈細讀寄來書

南澗志見

繁桃只稱倚紅扉
臈酒吹香著舞衣
樓底誰家吹玉笛
一雙白鷺上雲飛

池館夜坐聽雨

更聲隨雨動譙門
似聽泉宿楚原客
裡青燈如骨肉
獨能相待向黃昏

懷京下親友

海上經年思殺人
絕憐京國舊交親
過江唯有傳柑使
寄得書回是暮春

池上晚步

清池斜步竹煙微
鶯轉重門鎖夕暉
退食幸堪無趨謁
見人慙道聽公非

不寐

鼓角連天月滿城
芭蕉葉上露華生
思鄉不寐占潮信
說是中甸夜半平

夜坐池上館

沉沉畫戟隱高牙
月滿闕都十萬家
竹外小曹人睡穩
杖藜獨立聽鳴蛙

建安館夜坐聽流水

平生愛慕武夷君
及此名山阻白雲
九曲水聲流過郡
夜深猶得世人聞

路傍樹

路傍古木是誰栽更有山棠次第開東海神仙求不得
何因百歲客重來

臨觴

幾見春鐘度上陽偶因寒盡強臨觴故鄉只在車輪下
自是青雲路每長

范德機詩卷之九

范德機詩卷之十

臨江 范梈 亨父

絕句七言

戲題奉寄行營董僉事

五月沙山鐵騎羅將軍無那太平何悵前養得堂人鹿
祇愛行營芳草多

公堂暇日二首

新起危樓接大荒海天奇觀壓殊方周垣恨未高千尺
猶見他家竹短長
闌干祇合護黃花石徑循檐底自斜又是一年秋思過
蠻煙瘴雨滿天涯

西庫二植

緋桃結花儘自濃是誰著汝配蒼松也知不是凌霜伴
或可斜沾避雨封
山茶欲開還未開倍蕾應得數月來十分艷色固易悅
一種幽意自成裁

楊左轄養疾城東道宮因往候之會其細君亦至
戲成

分觴每在雲霞表飲藥還尋水竹邊本為避人來紫府
翻成挾宅上青天

道中

撫政如何弊百端極知民病救應難採山不給公家用

及此逃止問長官

雨宿白沙明旦過羅方市留題陳道士山房

橋邊禽語白雲和何必幽人在薜蘿早識壺中家近市
應能風雨棹船過

將如靖安徐文學自新挈舟來候良有古意以詩
留別

西風危棧逼青雲稍下臨江細路分問縣尚須窮日到
棹歌無計得留君

靖安縣看繡山

野人呼作外臺賓出見青山即所親天抵相看無避顧
枉緣泉石不干人

初歸自西郡

漁釣江湖本有情不應猶自縛微名
秋風吹起連天葉地近不聞譙鼓聲

口號二首

憲網高張意曷如太平只在巨奸除
君王神聖輿圖廣但願公卿守詔書

方冬瘴毒不曾消民命無能保暮朝
聞道嶺南多曠縣新官初去已飄飄

宿山寺二首

湖寺風煙接暮寒遠行心緒著雲端
此生豈不如高鳥猶計投林一夕安

晚堂初啓白雲封班馬悲鳴道路重
自有黃梁炊未熟上樓獨打政和鐘

將至三陽渡

何日重書大有年調和當在四時先
江南雁下霜清熟又是輕車按滂天

湖陰投宿

野人閉戶避霜旂聞定官名始出迎
一夜檢書更秉燭信知田里樂昇平

懷京城諸公書厓州驛四首

甚憶清河元侍講送行猶有玉堂詩
只今夜夜隴頭月

照見征人有所思

復憶濟南張吏部作詩文氣壓佳兒亦是門生輩尚想
他年似若翁

繡衣御史果能文蜀道新來有李君記得京城黃菊爛
為余來覓董將軍

妙為文字吾雄甲精切于今孰與儔說著奉常虞博士
恨渠猶不見厓州

縣下鑿池種樹成聚晨起視水淡五寸而草樹承
夜雨復蒼翠鬱然可愛戲題廳柱

檳榔池上芭蕉雨更種垂楊十六株中有玉堂蕭散吏
檢書正對鞦韆圖

至烏石邸舍二首

不見居人只見村離離茅屋又黃昏面前滄海來無際
聞說占城對縣門
苦竹叢西石色烏來時依舊驛亭孤自從歷徧厓州路
不敢彎弓射鷓鴣

懷東坊

帝城東下有柴扉手種黃花宅四圍歲歲年年得相見
如今只似故人稀

送清溪傅鍊師

清溪水上閉柴扉自此時人得見稀下界雨晴年穀熟
晨朝親理芰荷衣

福州雜詩五首

幕府前頭桃樹枝小寒新綠尚參差東園昨報花開徧
比較春功已太遲

前日題詩自候官計程今日到雲端家人定得平安字
最念癡兒不解看

海隅霜熟蠟房肥獅子橋東望翠微安得建陽一斗酒
少隨甘旨到柴扉

素梅落盡見初春自爾乾坤喜氣新乾鵲祇知庭樹好
飛來飛去肯緣人

虎豹幾曾驚石鼓魚龍獨解隱金沙遮藏翠荔餘千剝
掩映朱霞倚萬家

至海口

曾隨仙杖集靈臺謝流落于今豈不材但比麻姑休狡
獪兩行持節過蓬萊

上元日

蓬萊宮闕峙青天後內看燈記往年誰念東籬山下路
再逢春月向人圓

會同道中

緩乘羸馬踏蒼苔山谷風驚瘴雨開白髮攢柳林下叟
侏儻似道客曾來

炎州歌

僖人七十未為稀白髮龐眉盡布衣更說峒儒過五百
眼中思見社鴻飛

二月二十四日自瓊州出白沙驛阻風二日不得
渡海是日有幕客送寒衣却出賦詩二首

盲風怪雨一時清又阻扁舟兩日程天意似將留客住
明朝浮海看清明

芍藥荼蘼已結花無人江郡寄天涯淒涼更欲辭寒食
猶恐傍觀議太奢

趙僉憲舊居

閉門付與東風掃獨客殘春思遠道日午不見蝴蝶飛
細看兒童弄芳艸

鬱林次韻寄懷王天輔知事

乍喜連山瘴霧收黛眉更自鎖鄉愁自從行李達滄海

九日初逢第二州

峽上芙蓉

峭壁芙蓉盡作花淡紅淺碧映江沙由來客裡無聊賴
獨有秋光勝在家

青山亭

粵水燕雲幾夕暉鄉心日夜繞庭闈郵亭正在青山下
却望青山未是歸

元夕出南門下觀燈

杖藜煙路感疎鐘殘照隨人領亂峰看得漁村昏似墨
一時清水出芙蓉

齋居即事用教徵君韻四首

故人不見意何如
流水孤村處
士廬猶記去年霜
橘熟分甘曾得寄來書

讀書堂上煮春茶
兒子風儀靜更嘉
近謁麻姑人問道
手持壇左白蓮花

傳業須知遺子孫
安持家莫學故人寒
青雲猶解梯空致
不事高懷不可干

桑溪竹圃路團團
門巷都非少日看
送客棹船頻借問
向來江面是闌干

雜韻四首

江浦梅花無一片
野堂燕子又重來
誰能不飲拚書卷
却復將歌入酒杯

晚來急雨洗青春
便似翻江送鬼神
且喜新堂無下漏
猶嗔缺壁見東鄰

陽春久無春笋生
今年浪喜新竹成
直須向上開幽徑
白日尋詩取次行

芍藥新來結五花
臨階憐汝混蓬麻
有時剪盡都緣雨
無意尋芳別似霞

題羅氏思亭

我亦山中有所思
新亭獨缺廣平碑
吾身有盡情無已
不係春秋雨露時

戲題林塘二首

種柑何日向橫塘
眼見枝梢逼短牆
指日風霜成細實

採來須慰府諸郎

一曲清江抱隴斜東風點徧紫藤花是中豈有陶貞白
絕似江東學道家

四月

長山四月陡如秋新竹蕭蕭白露稠空谷病身偏易感
却思萬落戒征裘

初夏即事次陳愈之韻五首

春歸已覺川原暗地僻初逢舍宇晴堦下清池潛躍鯉
日中翠木響流鶯

物色如斯奈病何新詩賴比去年多祗緣未得交游棄
時肯敲門載酒過

隙地初無半畝寬雨餘妙長碧琅玕滿川風月無人共
且遂支筇獨自看

臥病江天白髮侵簞瓢自足養雲林情知賤是吾家素
尚肯誇人帶上金

珠璣落手有餘清絕似陽春白雪聲謾為無成嗟皓首
文章須用老能人

春日次韻友生絕句四首

馬頰河陽近北辰去來猶爾恨通津陌頭總是春風樹
自笑楊花只戀人

莫怪經年笑語頻長因無語易傷神擬將何事留功業
賴有麒麟畫是真

旅食京華日欲晡
家園迢遞隔天隅
妻孥預識羈懷苦
解事新來一字無
詩興逢春尚未闌
玉巖驚見雪初殘
衆芳淡白閑天意
不奈顛風弄曉寒

雨後二首

皇天何意倒滄溟
不放好山來戶庭
昨夜土中一尺潤
南鄰椒樹有微馨

離離野艸異荃蘅
莫怪行逢未識名
省得秋風來十月
繞門應自逼人生

題杜工部春遊圖

大帽長衫蹙蹇驢
春風不肯潤詩臞
陌頭無限尋芳者

何故令人少畫圖

寄懷西臺潘御史二首

使來承問察安西
想及鄉山荔葉齊
人世祇騎驄馬好
也須多負醉如泥

燕門杜粟西風高
西園佳人朱繡袍
河經華下東入海
我遡懷之心極勞

觀瀾亭

水晶簾影壓青天
獨立悠悠見逝川
始信平生萬里眼
匆匆不似畫欄前

琴山

青山還與暮雲連
載酒重來又幾年
一夜驚鴻啼到曉

不知流水似鳴絃

明德堂

嘗因涉世感吾初學問工夫拂劍如八尺橫窗天似水
丹銘^鉛獨坐看遺書

崇真宮陳真人院會宿二首

雲宮煙闕夜沉沉夫子溪居長道心我有高齋在城角
相期敬枕聽秋砧

玉堂金馬自浮沉異代東方避世心況是蕊宮今會宿
夜深鐘磬雜清砧

中秋

欲倒清樽待月生樓西樹樹作商聲瀟水瀉作天街雨

洗淨浮雲分外明

月下曲

楚女修眉不解顰偶逢秋月倍傷神也曾低似庭前樹
暫到綠空愁殺人

贈洪教授歸江南

春莎換得綠朝衣咲具江船萬里歸莫遣沙頭鷗鷺怪
隣莊秋雨稻梁肥

菊

萬壑秋聲日夕哀主人庭戶菊初開寒香正爾多情思
自是游蜂不解來

夜中大風菊盡折曉起觸事而作

昨夜秋風繞敝廬
心憐黃菊映秋渠
闌干本為花藩障
顛倒朝來總不如

登樓

獨上高樓望帝州
浮雲滄海兩悠悠
縱然得逐飛鴻去
猶自不知天盡頭

西軒即事二首

見惡如農有至言
閑居因物感心原
清霜只得芭蕉葉
不肯深根長子孫
行厨晚食坐蕭條
欲買鱖魚待早潮
鼓絕山城門未掩
夢和疎雨度西橋

春日西郊

東風千里福州城
綠水青山老送迎
惟有垂楊偏待客
數株殘雨帶流鶯
佳人不讓海棠嬌
喜見天晴泥露饒
若使有詩寧費日
便令無酒亦終朝
江上登臺望眼迷
西禪更在石峰西
尋常楚嶠看花日
此處青苗綠已齊
南澗清晨不易得
無有更似此時春
朱桃皓李都隨意
紫蝶黃蜂故趁人

經石門鎮

搖落石門秋水清
殘僧樓宇映沙明
買船欲上盱江去
路轉峰高聞雁聲

廣居查尊師家藏東坡竹

古藤五尺霜煙交不見長身見墨梢千載高風猶一日
不妨儋耳任無茆

聞角

西風嫋嫋拂弓旌千里來看曉角聲縱復淒涼歸未忍
炎州此外更無城

懷臨江寓居

石霜峰北滄西頭寄住林塘數畝幽比及到家猶是客
對人強自說鄉愁

清明日

旅庖欲禁自無煙酒裡中原熟食天不分小桃紅似火

為人兒女照秋千

聞笳

何處聞笳最是悲京門獨立晚晴時鸚鵡一去荒郊遠
借問春光有底遲

夜誦賦瓶花

膽瓶折得樹頭花初是東園一片霞西澗讀書過夜漏
忽隨燈影上窗紗

寓書

欲寫鄉書寄故園行人已遠意空存舉頭却見南來雁
箇箇隨春度塞門

山僧養犬

不見巖扉淨業君
山僧養犬謾成群
人知自此來看少
祇向山中吠白雲

憶得

憶得佳人白紵詞
幾將天外數歸期
自從落盡庭前樹
夜夜秋聲總不知

聞東鄰歌

促指繁歌沸不停
月高絃語轉明星
莫令知有西鄰客
獨坐挑燈課六經

贈郭判官

慈烏夜夜向人啼
幾度紗窗兔魄低
自有平安三百字
無因却寄大江西

種樹

種樹江頭不記春
年來年去祇傷神
今朝忽向江頭見
稍有清陰茫路人

溝上

御溝新綠動朱闌
溝上垂楊盡可看
一作觀唯有西山九
千仞朝朝闕角倚晴寒

臥病

朝來忽見樹藏霞
碧草春邊逕路斜
佳客不來春雨盡
山禽啄徧小桃花

靈應宮

萬花如繡擁青紅
梯石稜層見梵宮
一十二時春百刻

日長半在鳥聲中

清明日留西山

離家六度見清明知是何時出帝京今日登臨倍惆悵
好山多似豫章城

逢芳草

忽逢芳草思綿綿綠徧郊原翠滿川不是王孫歸未得
盡緣春色有今年

西谷訪人不遇

出郭幽人晚未歸青天咫尺見何稀一年祇有春晴好
多事楊花學雪飛

題閨人望遠圖

即行不用苦悲辛久別心知萬事親看取江邊垂柳樹
最先零落最多春

酬友人月夜見寄

舍北舍南流舫通高荷萬柄倚微風不識此時明月夜
共誰談笑水煙中

題沈李二山人談道圖

白雲流水兩無情一段忘言畫不成昨夜天壇明月滿
野風四壁候蟲鳴

春日上平坡寺

蘿逕陰陰近百層金輿記是昔人登山僧苦避尋詩者
牢閉柴門喚不應

省災初至新建山谷中人家

新建一作建安

卹災猶自惱漁樵太息無時緩賦徭日暮解鞍仍秉燭
強顏聚吏戒科條

山下

樓外風江集米船樓中光景月流天空洲此際無鳴雁
猶比山深少夜眠

章義門送人還南城觀臺

郊原平晚綠萋萋獨上高臺意轉迷古樹鳴蟬城下路
送人長憶向安西

臨懷臨江寓居

抄重

石霜峰北滄西頭寄住林塘數畝幽比及到家猶是客

對人強自說鄉愁

西垣感春

簾幙沉沉燕子歸牡丹帶露泥春暉依然畫省風光妙
少問去年人是非

楊花

穿空透戶本無因若便隨風惱殺人我似楊花花似我
年年飛盡玉堂春

挽西蜀先生

八十猶傳隱者名乾坤未是負先生無端白帝城邊水
欲載哀歌上玉京

歸自館中聞鶯

春來羈思不堪論
日日瞻星謁禁垣
昨夜回來津口聽
嬌鶯啼斷內城園

友人壁間寒山圖

行盡天涯不見秋
君家庭院冷颼颼
太平欲選風霜吏
畫史當居第一流

東郊

東郊芳草綠萋萋
欲到渾如戀馬蹄
總是都門好春色
隨人直到大江西

絕句

幽人不出戶長閑
看盡春風長綠苔
多謝有情雙燕子
暫時飛去又飛來

懷南省海棠感新事作

海棠花發醉題詩
猶記西垣下直時
今日豈無歌舞地
一尊先被外人知

贈聊城施主

京國相逢意若何
向人平讞路人歌
臯陶此去為廷尉
似子寧疑一椽多

贈盛復之之官宣德

帝城穀雨見黃鸝
關外風光大較遲
想得牡丹花落後
先生初是到官時

戲題張平章所贈洪生書後

一翁二季響皇都
未必遭逢事太殊
祇惜翰林歐學士

當時書讓蔡君謨

贈水鑑道人寫真

鑑畫公卿寫盡真此心澄徹故通神
世間未用論滄海何日河流照得人

十二月十九日候進賢該吏不至看野人家道書
社農家近白鷗沙并繫停驂候早霞
閒啟古囊看法錄此身如到玉清家

送薩僉憲至巖頭渡

石頭渡口風煙古洗盞開尊對淺沙
却喚掾曹無覓處移船幽寺看黃花

小年日仍宿北山

臘日才過又小年那堪澤國雨連天
兒童把酒傳明燭遠想慈親尚未眠

題秋林圖

霜樹前頭欲下禽遠行逢有暮歸心
佳人昨日天際作涯去紅蓼作花秋正深

孝友堂

堂前多種紫荊枝堂上能啼白髮兒
但恨後來風雅廢南陔不似古人詩

和揭曼碩茂才揭常過臨不遇留題墻壁

麻姑蚤解髻成霜況說山中海與桑
久別南城壇近客西風殘照憶題墻

題煙雨圖

似有江南布穀聲
亂流觸石野橋平
何由招得魚竿客
共上西峰看晚晴

題稚川蘆雁圖

不見羅生心惘然
畫圖河朔盡流傳
滄洲舊隱無人識
正似寒蘆落雁邊

伊孝子

是州寧有古藤君
子弟班班行義聞
又說水村煙郭外
伊家水樹抹青雲

題松雪圖

傍人不識歲寒松
憐殺溪山大雪封
待得化為東海水

青天白日睡蒼龍

桃花原是漸嶺對江

雪晴尋路入華原
絕愛清江抱遠村
行處祇貪幽樹好
不疑山谷易黃昏

范梈字亨父又字文白德機其別號也種詩凡七種共
十二卷今不盡傳海虞毛氏所鐫係從至元間刻本
臨川葛籬仲穆所編次者余後取清江楊翠熊逵選
本補入古今詩共一百七十四首編為十卷元本滿
字最多毛氏初刻時先君為校正改補今余所錄
則為先君與祖生家兄三次校定本也注為一作

某者則為楊鞏選本毛氏跋稱其母態守節及母終
哭之過哀未暮而止其孝行可風余故重其人不獨
以詩也辛未仲春花朝前五日金保錄并識



范德機詩卷之十終



卷之四